

東
華
續
錄

東華續錄

同治一

臣王先謙敬編

臣張式恭恭校

穆宗毅皇帝 文宗長子也 聖母慈禧端佑康頤昭裕莊誠壽恭欽獻皇太后那拉氏前任安徽徽甯池太廣道追封承恩公惠徵之女稟粹通門延釐天室事 文宗顯皇帝柔嘉維則淑慎其儀化佐坤元祥符震索以咸豐六年丙辰三月二十三日未時誕上於御園之儲秀宮時 孝貞顯皇后方切祈禱之禱適符主器之占 聖懷慰悅撫育恩勤同一致焉 上之生也 文宗以

天恩 祖佑喜溢丹毫爰有庶慰 在天六年望更欣率土萬斯人之詠由是 常雩成禮則有云 鴻恩幼子千春慶湛靜升香則又云喜見麟孫慰 母思而且喜音之額彪炳 璇題周歲

之章焜煌 宸翰固不待誕膺洪祚早知 世德克承已 上聰
明天竄氣度煒如英毅外流沈潛內蘊六齡就傅 文宗特命受
書於翰林院編修李鴻藻厥後大學士祁寯藻翁心存倭仁檢討
徐桐修撰翁同龢諸臣同心納誨輔導 聖功 盛德大業富有
日新建乎繼序之初 思齊作則 上稟承 懿訓念典逾勤主
善爲師則 殿開弘德以古爲鑑則書 賜啟心 聖學旣充
皇猷斯懋續承 謨烈 簡任賢親 文教誕敷 武功耆定巍
巍蕩蕩蔑以加已 上生有聖德純孝性成奉事 文宗暨兩宮
皇太后承 顏養 志式洽 聖心恭讀 御製詩有云繞膝
堂前助笑顏蓋雖在幼齡而 宮寢追隨 庭闈拜舞極 天家
樂事焉歲在庚申 文宗三旬萬壽 賜宴臣工時 上甫五齡
稱觥祝 壽儀度備嫺 宸懷彌暢 特命 上出見廷臣凡瞻

仰 天表者莫不稽首歡呼益信 聖 聖相承篤膺 天眷無
疆之休基諸此矣是年八月 文宗舉行秋獮 駐蹕灤河上
奉兩宮 皇太后從○咸豐十一年辛酉秋七月丁亥朔越癸卯
文宗顯皇帝賓天先是 聖躬不豫 上侍疾煙波致爽殿籲
天虔禱問視維謹壬寅 文宗疾大漸召御前大臣載垣端華
景壽肅順軍機大臣穆蔭匡源杜翰焦祐瀛承寫 硃諭立皇長
子 爲皇太子越翌日寅刻 文宗升遐 上稽顙大慟擗踊無
算扈從諸臣遵奉 遺旨請 上卽正尊位辰刻 上恭視小殮
畢奉安 大行皇帝靈駕於煙波致爽殿東間○諭內閣朕受
皇考大行皇帝鞠育顧復深恩昊天罔極 聖壽甫逾三旬朕宮
庭侍奉正幸愛日方長期願可卜上年夏閒偶患痰嗽旋即調攝
就痊秋閒 巡幸灤陽 聖體康彊猶昔乃因各省寇氛未靖

背肝焦勞至本年春間風寒感發舊疾六月間復患暑瀉以致元氣漸虧本月十六日子刻力疾 召見載垣端華景壽肅順穆蔭匡源杜翰焦祐瀛 特命承寫 硃諭立朕爲皇太子朕痛哭受命哀迫戰兢方冀 慈躬轉危爲安常承 恩誨詎意親奉

顧命後病勢增劇遂至大漸十七日寅刻 龍馭上賓搶地呼天攀號莫及敬思 皇考御宇十有一年 惕厲憂勤 萬幾鮮暇無日不以敬 天法 祖勤政愛民爲急務蠲緩賦稅簡拔人材國計民生時廑 聖慮凡有血氣者其悲哀感戀罔不出於至誠朕之泣血椎心尙忍言乎惟念 付託至重責在藐躬尙賴內外文武大小臣工共矢公忠弼予郅治其帶兵大員尤須嚴申軍律迅殄賊氛各直省督撫亦應撫輯斯民以仰慰我 皇考在天之靈朕實有厚望焉至喪服之制欽奉 皇考遺詔令依舊制二十

七日而除朕心實所不忍仍當恪遵古制敬行三年之喪庶幾稍盡孺慕之誠至於 郊 廟祭祀大典自不應因大喪而稍略其禮其應如何遣官恭代及親詣行禮之處著各該衙門查照向例集議以聞其天下臣民應持服制仍照定例行將此通諭中外知之○命睿親王仁壽豫親王義道恭親王奕訢醇郡王奕譞大學士周祖培協辦大學士戶部尚書肅順吏部尚書全慶陳孚恩工部尚書綿森右侍郎杜翰恭理喪儀豫親王恭親王周祖培全慶仍在京辦事○命署直隸總督文煜來熱河叩謁 梓宮○甲辰上恭視 大殮畢奉安 梓宮於澹泊敬誠正殿行殮奠禮

上以煙波致爽殿爲倚廬席地寢苫每日詣 几筵前奠獻三次

○奉 母后 聖母居煙波致爽殿每日親詣問安○諭內閣朕

續承大統 母后皇后應尊爲 皇太后 聖母應尊爲 皇太

后所有應行典禮該衙門敬謹查例具奏○諭道光三十年 皇
祖宣宗成皇帝大事 皇考曾遵嘉慶二十五年成例停止各省
將軍督撫提鎮藩臬及鹽關織造等來京叩謁 梓宮今 皇考
大行皇帝在山莊升遐恭奉 梓宮回京除熱河都統本在熱河
直隸總督已諭令前來熱河叩謁 梓宮外其餘直隸各大員俱
不必前來各路統兵大臣各省將軍督撫副都統提鎮城守尉並
盛京侍郎奉天府尹西北兩路將軍大臣及學政織造關差等均
不必奏請前來致曠職守各該大臣將軍督撫提鎮等受 皇考
深恩惟當竭誠盡職以期無負委任不在儀節虛文也將此通諭
知之○諭 皇考大行皇帝龍馭上賓朕應恭奉 梓宮回京進
宮後暫安觀德殿所有一切典禮著在京恭理喪儀王大臣先期
敬謹豫備其沿途經過地方所有 蘆殿地盤及橋梁道路古北

口以內著直隸總督恭辦古北口以外著直隸總督會同熱河都統恭辦著卽督飭各該地方官妥速辦理務須一律寬平穩固不得草率遲誤其承辦各員不准藉名科派擾累閭閻以副 皇考

惠愛羣黎至意○諭道光二十六年三月 皇祖特降 諭旨以

二名不偏諱將來繼體承緒者上一字仍舊毋庸改避亦毋庸缺筆其下一字應如何缺筆之處臨時酌定以是著爲令典等因欽此今朕敬遵 成憲將御名上一字仍舊書寫毋庸改避下一字毋庸缺筆凡臣工章奏內遇有此字著用淳字改避其奉旨以前所刻書籍俱毋庸議○乙巳諭內閣自古神聖之君繼天立極必有隆稱顯號昭示來茲洵萬世不易之典也我 皇考大行皇帝御宇十有一年寅畏敬恭朝乾夕惕 郊壇大祀至誠昭格展敬

陵 廟盡制盡倫卽位之初廣開言路 手諭訓勵臣工痛戒

因循杜貢獻以昭節儉闡性理以崇聖學勤求邱治整肅紀綱孜孜惟恐不及泊乎邊隅不靖命將出師任賢勿貳疊簡巨憝捷書入告未嘗稍自矜伐每當軍書旁午日昃不遑 召對臣工 親裁庶政十一年如一日偶值偏災蠲除賑貸惟恐後時開海運以實倉儲廣中額以興文教敦睦宗支欽恤庶獄舉行團練而武備修整飭戎行而軍威振愚民悔罪投誠寬其既往予以自新凡此皆以天地之量爲量以堯舜之心爲心顧予冲人仰承 遺命寅紹丕基雖 至德謙冲 聖不自聖而永懷 啟佑之恩宜備尊親之典詳考彝章恭上 謚 號著大學士九卿等詳察典禮具奏○諭惠親王係朕之叔祖其尋常召對及內廷筵宴等禮節業經 皇考大行皇帝加恩免其叩拜以示尊崇惇親王恭親王醇郡王鍾郡王孚郡王均係朕之叔若於內廷召對動輒叩拜與

諸臣略無區別朕心實有不安嗣後除朝會大典仍遵定例行禮外其尋常召對以及三年後內廷宴賚均無庸叩拜至宮中祭

神賜食祭肉應向上叩拜惟不必於朕前隨眾行禮遇有賞賜

物件著具招謝恩無庸當面叩首以示朕敬長親親之至意○詔

各遊牧之蒙古王公台吉等俱免來京○丙午諭內閣各省督撫

鹽關向有呈進方物朕見在諒陰之中食處皆所不安著通諭各

省督撫鹽政織造關差等一應貢獻概行停止卽食品亦不准呈

進俟三年之後再候諭旨○諭本年順天鄉試著展期於九月內

舉行本年補行恩科武會試及順天武鄉試如何展緩辦理之

處著兵部迅速議奏尋奏武會試展至十月舉行武鄉試展至十

一月舉行從之○官文胡林翼李續宜奏逆首李秀城竄踞江西

瑞州義甯武甯各郡邑後分擾興國崇陽通城大冶通山武昌咸

甯蒲圻等州縣逼近省城臣李續宜因武昌縣城與黃州府城隔江對峙恐賊踞修礮壘阻我長江卽派道員蔣凝學率湘左等營前往守禦旋據蔣凝學稟稱賊已竄踞武昌縣城該道會同水師遊擊曾紹霖等督帶礮船水陸夾攻蔣凝學督率隊伍直駐武昌近城之西山左右設伏城賊分路來撲蔣凝學等親自督戰賊眾不支伏兵齊起賊遂大敗復經水師沿岸轟擊計殺斃騎馬賊目三名賊匪數百名淹斃受傷者尤眾生擒七十五名賊受創後閉城不出經曾紹霖等用礮環擊賊不能守遂於十六日奪路而逃當將縣城克復該逆大股仍盤踞興國之龍港等處擄掠民船希圖上犯先經臣官文派撥唐瑞廷等帶領礮船入梁子湖迎擊按察使彭玉麟派水師參將喻俊明連日攻剿斃賊數百名焚燬賊船五百餘號嗣臣胡林翼由太湖回省先經臣官文臣李續宜派

總兵成大吉率貞右等十營蔣凝學率湘左等四營知府毛有銘率湘右等二營都司孟麟率馬隊由省南之保安金牛一路進剿興國大冶等處副將何紹彩等帶新訓四營遊擊王先昌率新昌營都司李克儉率馬隊由省西之咸甯進剿蒲圻崇陽通城等處並飭會合已革皖南道李元度上下夾擊分路前進維時署咸甯縣知縣金東昀等督率兵勇於六月初二日將縣城收復適李元度所部各營自平江拔營將馬港乾塘坳等處節節掃蕩敗賊遁入通城於西門外孤簫山築壘二座賊首僞黃天幅伍逆等將城加高安設滾木梅花椿爲久踞之計李元度派遊擊李正盛等進攻西門一路又派守備王清等進攻東門一路該道率都司王連發等進攻南門中路先將黃泥坳賊卡攻破槍斃多名知縣傅詩督帶紳團兵勇直趨孤簫山賊壘該逆開礮抗拒我軍奮勇猛撲

將火彈延燒賊棚逆眾慌亂退入西北門我軍跟蹤進城殺賊三百餘名逆眾向崇陽奔逃卽於六月初三日克復通城縣城餘賊向南樓嶺越竄有由桂口司歸併崇陽者李元度派各營進紮桂口自率岡字等營駐守通城初五日陳奉彝等率五營直逼崇陽南門外山岡約會知縣王筠節勘明進兵之路往誘賊戰該逆伏匿不出初六日該營等三路進攻悍賊千餘人拒戰其餘逃往寒泉大源一帶係往通山義甯之路經各勇槍斃百餘名該逆且戰且逃我軍追殺六百餘名生擒七十名救出難民數百餘名卽於初六日克復崇陽縣城何紹彩等復由咸甯進剿搜殺餘匪成大吉等由武昌縣屬之保安金牛沿途剿洗踏平賊壘殺賊甚多所有分擾興國大冶通山之賊經水師節節堵剿賊已不能逞志嗣見金牛大股挫敗我軍分道齊至逃往江西義甯各該州縣地方

均已平靖見在李元度之軍已乘勢追出義甯州並移會江西交界各州縣實力堵剿所有在事尤爲出力員弁兵勇容俟查明覈實保獎 上諭逆首李秀城竄踞江西瑞州等郡縣後糾集大股擾及興國崇陽通城大冶通山武昌咸甯蒲圻等州縣逼近省城經官文等調派各軍分路剿辦將武昌蒲圻等縣城次第克復省南一律肅清辦理甚爲得手著官文等督飭各軍實力剿洗毋畱餘孽在事出力員弁兵勇著官文等查明覈實保奏候朕施恩○官文胡林翼李續宜奏查通城崇陽敗賊逃竄義甯州屬之官溪李元度隨派營官吳蘭蕙等於六月十二日直抵官溪該逆不意我軍驟至初猶冒死抗拒繼見官軍圍攻甚力紛紛潰竄各營趕殺百餘人十三日我軍進擣州城先將杭口賊卡攻破擊殺百餘人餘賊敗奔入城十四日各勇攀堞登城呼聲震地該逆且戰且

退經我軍殲斃二百餘人生擒七十餘名敗賊分竄武甯新昌兩處追殺各數十里登時克復城池除查明出力員弁兵勇擇尤保獎籲懇恩施外已革按察使皖南兵備道李元度於旬日之內連克通城崇陽義甯三州縣城池實屬奮勉可嘉可否籲懇 天恩賞還李元度按察使原銜以昭激勸其在皖南道任內失守一案仍由會國藩訊明分別辦理 上諭官軍克復通城崇陽後餘賊逃竄江西義甯州屬之官溪地方經官文等督飭李元度乘勝進剿將義甯州城克復已革安徽徽甯池太廣道李元度著賞還按察使原銜其失守一案仍著會國藩訊明分別辦理○實授駱秉章四川總督督辦軍務○召劉源灝來京以福濟爲雲貴總督崇實爲成都將軍並接辦川陝交界防堵事宜○會國藩奏去冬以來竄擾江西之賊前後凡五大股其由皖境竄入自北而南者三

股一曰僞主將黃汶金連陷建德鄱陽六縣經左宗棠鮑超於洋塘擊退一曰僞侍王李侍賢連陷浮梁景鎮等處經左宗棠於樂平擊退此二股均未能深入江西腹地一曰僞忠王李秀城正月
初間連圍玉山廣信廣豐三城未破又深入內地圍建昌撲撫州亦幸未破三四月間竄入崇仁樟樹鎮吉安峽江並占踞瑞州府城分擾奉新靖安武甯義甯各州縣五月間又竄湖北之興國大冶蒲圻崇通等處此北三股也其由兩廣竄入自南而北者二股一曰廣東股匪其頭目有周姓許姓上年十月由仁化樂昌闌入江境圍攻信豐南豐建昌各城連陷河口興安德興婺源十一月
初經左宗棠攻克德婺兩城該逆遂歸併徽州城賊黨一曰廣西股匪其頭目爲朱衣點彭大瞬等本石達開餘黨由廣西竄出湖南經過南贛陷福建之汀州回竄江西蹂躪甯都建昌河口等處

其前隊已由婺源竄浙後隊尙停留撫州屬境此南二股也五大股中又各爲三支四支忽分忽合時南時北是以頭緒紛煩御史華祝三所稱去秋竄擾甯都撫建者廣東周姓等一股也今春由玉山撫州建甯陷吉安瑞州者僞忠王李秀城一股也諭旨所指臣奏樂平鄱浮肅清者僞侍王一股也毓科奏撫建解圍吉安新淦失而旋復者亦僞忠王一股也江西本臣統轄之區自應力籌兼顧臣處張運蘭江長貴朱品隆各軍皆駐防徽境斷難移動左宗棠一軍則久在江西之北境援勦饒州廣信各屬並未入皖六月初旬始以一半畱江之景德鎮一半移皖之婺源勢難再顧他處惟鮑超一軍爲江皖兩省游擊之師二月間忠賊由建昌圍撫州臣恐省垣震動卽飭鮑超由湖口赴援旋因撫建解圍樂平危急不得已調鮑超先救景鎮不果入省迨浮樂肅清而皖北陳四

眼狗大股攻撲安慶圍師之背勢更危險臣移紮東流又調鮑超
援勦集賢關之賊五月初間始將關外赤岡嶺四賊壘圍剿淨盡
臣與胡林翼商令成大吉一軍回援鄂省鮑超一軍回援江西鮑
超於五月十五日集賢關拔營行抵宿松被紳民苦畱圍攻宿城
五日未下正擬帶隊西行狗逆忽從南岸邀僞輔王楊輔青及林
紹璋黃汶金各股將由桐城復援安慶雖下游各軍迫望援師而
臣權衡緩急仍檄鮑超迅由九江直擣建昌先保江西省城不能
兼顧安慶此臣派鮑超援江西之先後節次也瑞州及各縣踞賊
偏近南昌前經撫臣毓科商畱副將張運桂老湘營千人並調遊
擊劉勝祥一營扼紮城外會同江省原有官兵協守又得內河水
師節節布置省垣重地尙無疏虞又有劉于濤二千人紮堵安義
寶後營千人紮營生米丁俊二千人駐守臨江皆爲省垣西路屏

蔽此次鮑超由東北進鄂軍由西北進兩路夾擊賊如敗遁必不敢窺伺省城但恐官軍追急仍回竄吉安一路臣擬飭總兵陳金鼐帶新募千勇移紮吉郡並添撥陸軍數百水師兩營以資控禦又飭贛南道李瀚章固守贛城以杜竄突至李金陽戰敗陷賊旋即逃出臣已訊明正法矣又奏查六月初旬祁門嶺外之賊連日犯嶺朱品隆出隊擊之賊遂遠遁皖北偽璋王輔王諸逆從霍山越嶺圍攻太湖陳四眼狗盤踞桐城之三塘埂將夾攻多隆阿一軍再撲安慶圍師之背安慶城外賊壘十八座經曾國荃全數踏平將賊眾八千餘人圍殺淨盡此次賊黨前來報仇計日內必有大戰儻蒙 皇上威福再行擊退城池可復矣江西之賊西路偽忠王一股分擾德安建昌去省甚近臣見派鮑超全軍往援必可得手東路朱衣點一股蔓延金谿鉛山等處臣尚未派有援兵湖

北之賊南岸蒲圻咸甯崇通均已肅清惟大冶興國未靖見派成大吉一軍往剿北岸德安黃州蘄州隨州等城均尙爲賊所踞與下游桐城霍山等處之賊黏連一片剿辦實屬不易幸官文胡林翼李續宜俱在鄂省武漢根本之地深固無虞均報聞○予福建陣亡知府孫家良遊擊生麟等祭葬世職○丁未諭軍機大臣等前因巴棟阿馮子材疊奏逆匪踞擾沙洲江防緊要請專派大員總統下游師船駐泊鎮江當經 皇考大行皇帝諭令都興阿黃彬卽飭總兵吳全美速赴下游總統鎮江至江陰一帶師船就近防勦並於駐泊北岸之總兵陳國泰周希濂李德麟三員內酌量添派並分撥師船前赴鎮江駐泊歸巴棟阿等調遣妥爲布置茲據都興阿黃彬將長江水師南北上下游布置情形縷晰陳明並繪圖貼說馳奏前來據稱江面各幫船隻分防各口本屬不敷所

恃事權歸一將士用命無論何處有警皆可立時酌調飛援若添派鎮江江陰另一總統又撥兩總兵分船數十號歸鎮江調遣轉致事權不一呼應不靈又聞下游各口賊船多假官軍旗幟圖謀出竄水師若再分屬詐冒更恐難以稽查嗣後遇有緊急黃彬勢須兼顧北岸其水師督戰卽飭吳全美前往統率以專責成等語自係實在情形著都興阿等卽按照所奏辦理嗣後南北兩岸上下游水師防剿均責成都興阿黃彬隨時與巴棟阿馮子材聲息相通妥籌策應鎮江孤城堅守如因水師策應不及致有疏失惟都興阿等是問將此由六百里各諭令知之○諭前據張亮基奏徐之銘擅殺就撫回民偪令浙江候補道馬椿齡自盡般斃通海縣知縣雷焱種種貽誤各情並據徐之銘奏升任雲南巡撫鄧爾恆在曲靖被戕一節疊經 皇考大行皇帝諭令劉源灝查辦嗣

據徐之銘奏回匪假撫攻襲省城馬椿齡途次病故雷焱被傷身
死均請議卹鄧爾恆被戕別有情由並與張亮基意見不合各摺
片與張亮基前參徐之銘各款均不相符著福濟於到任後詳細
確查將張亮基與徐之銘辦理回務如何意見不合鄧爾恆如何
被戕情形馬椿齡雷焱如何身死並張亮基所參徐之銘各款及
交劉源灝查辦各件一併秉公詳查具奏將此由五百里諭令知
之○戊申諭軍機大臣等勝保奏切陳皖豫大局棘手情形一摺
前因苗練託名就撫未將盤踞正陽霍邱之眾撤退其黨復由潁
州竄豫意在竊據淮甸控制江河 皇考大行皇帝明降 諭旨
命勝保督辦安徽河南剿匪事宜並 諭令以剿捻之名爲制苗
之策原以專倚畀而一事權茲據勝保憑陳苗練今昔情形不同
辦理實形棘手請另簡大臣畀之經略各等語該大臣公忠體國

朕所素知豈可因時事艱難稍存諉卸仍當遵奉前 旨俟北路

肅清後再行統兵南下彼時勦撫兼施使民團不受該練脅制以

孤其勢是在該大臣相機辦理朕亦不爲遙制該大臣受 皇考

厚恩諒能事事仰體實力籌辦所請另派大員經略之處著毋庸

議見在直隸山東一帶伏莽尙多該大臣仍當就見有兵力激勵

將士痛加勦洗不可稍形鬆懈將此由六百里諭令知之○以毛

鴻賓爲湖南巡撫華日新爲江蘇布政使

由廣西按察使遷

○已酉命議

行三年喪卽羣臣以日易月之請○子河南陣亡參將吉昌等祭

葬世職○恭親王奕訢奏請前赴熱河叩謁 梓宮允之○以蔣

益澧爲廣西按察使

記名按察使

○辛亥袁甲三奏據張學醇等稟稱

該司會同博崇武進壽州城後查明從前擅殺一案實係蒙時中

愆愆遂諭令蒙姓族眾將蒙時中綑送到案博崇武帶齊十八坊

練總親赴下蔡與苗沛霖會晤議定城練聽官調度不許城內設局苗練卽全數撤退其事已有定局維時壽城由東南鄉買糧千餘石東南各圩練總護送入城行至東津渡迤東地方適遇苗練巡哨彼此懷疑接仗互有殺傷苗練退回營內各圩練總亦卽運糧進城而壽城練董從中簸弄是非以致苗沛霖必欲壽城先助口糧然後撤退壽城必欲苗練先行撤退再助口糧並傳苗沛霖作有克復壽州八論愈以激怒人心見在苗練仍未進攻壽民嬰城固守亦未迎敵臣已飛飭博崇武極力排解能否卽日釋然尙難豫定至苗練西竄一股始因洪河一帶土匪搶奪商賈不通苗沛霖派令苗憬開苗希年帶練前往詎苗憬開等爲西路土匪所勾擾及豫省邊境聞爲該省兵練擊敗是否確切尙未接豫省咨報其屯紮泗靈境內之練係都司丁潮臣管帶此次派員開導

該都司單騎來見並云伊雖苗沛霖部眾心實非之如苗沛霖從此反正仍當與之勦賊儻別有異謀斷不隨同叛逆臣已給予札諭飭同副將宋慶辦理澮北一帶團練又懷遠練總邵徵祥等均向隨苗沛霖辦練前因捻匪劉秉乾竄踞李家嘴圩寨相距龍亢不遠爲懷遠切近之災臣酌給子藥飭令帶練圍攻邵徵祥等頗爲感奮見擬酌撥官兵一千名前往助其勦賊實欲收服其心爲我所用使苗練之勢自孤總之苗沛霖性本陰鷲臣觀其所爲非不知感知懼而枝節屢生似有不能自主之意此時遽與決裂則兵連禍結從此無挽回之機不得不委曲求全以維大局臣見調張學醇來營細詢一切情形與李世忠妥爲籌商並飛飭博崇武趕緊調停如該練全行撤退自當妥爲駕馭責令勦賊立功儻陽作緩兵之計而陰蓄肆擾之謀臣卽一面攻其腹心一面明白曉

論聲罪致討爲次第埽除之計又奏臣因苗練不肯撤退又加派縣丞李國玠持札赴下蔡曉諭茲據回稱苗練又以黃鳴鐸吉學盛句引土匪進城爲詞必欲圍攻壽州其心實不可問並給臣稟函貌似恭順實則強詞奪理其狂悖跋扈之狀溢於紙上非以兵力制之斷不能就我範圍並稱查悉壽城因苗練要挾無已黃鳴鐸吉學盛皆有自危之心率眾堅守誓不相下邀約南路王舟等練以爲掎角接應連日接仗苗練傷亡甚多雖博崇武等極力調護而壽人不免疑其左袒見與總兵慶瑞尹善廷等均住城外營盤其營中兵勇乏食臣當籌銀兩送往以維軍心查苗沛霖中懷叵測臣所以屢示優容者原以孫家泰等均非善類是以允爲辦理乃徐立壯孫家泰及主謀之蒙時中或殲除或監斃或細獻該練仇怨已伸又復以黃鳴鐸爲詞無論所稟黃鳴鐸各情支離牽

扯難以憑信卽令許以查參而參黃鳴鐸之後焉知其不另有要挾且壽州兵練之心亦不可使有觖望致令羣情解體此萬不能再事包容之實情也但該練人數不下十餘萬往往圍攻一寨累月經旬期於必破其勢不易埽除況臨淮四面皆賊無一路不須嚴防而在營不過萬餘人何可稍形孟浪見與李世忠商調總兵朱元興酌帶隊伍由滁州來臨一面仍與和解俟我兵一齊卽迅速進剿使其應接不暇臣又將丁潮臣一股收撫使爲我用其龍亢等處之練攻破李家背賊營臣復爲具奏請獎該處練眾亦有欣欣向官之意此兩處歸官苗練之勢已去大半此外沿淮被偏各寨臣與李世忠已暗中收撫並因朱元興本係壽人可以聯絡壽州東南各關若淮南再能一律歸官則苗練雖欲反覆兵練之力均足制之其西路團練應如何策應已函屬賈臻妥速籌辦至

潁東各練本屬一意從官歸張學醇統帶近因賈臻不與接洽人心復散昨接該署撫來信郡城以外均已附苗其如何辦法臣亦未得其詳應請飭下該署撫亟思自強勿以請兵請將爲塞責之地且該署撫旣不能顧及壽州而壽州以上匪勢縱橫日久愈難收拾並請飭下該署撫親自帶隊酌量進駐勿株守潁郡置各處於不顧也 上諭軍機大臣等袁甲三奏苗練圍壽之隊尙未全撤見飭傳崇武極力排解又據奏苗練藉口要挾不肯撤退練勇見籌添兵勦辦各一摺苗沛霖以黃鳴鐸等勾引土匪進城爲詞必欲圍攻壽州其蓄意謀叛已可概見勢難再事羈縻袁甲三已與李世忠酌商飛調朱元興帶隊赴臨淮一面仍暫與和解俟兵力一齊卽迅速進剿並收撫丁潮臣等股以孤其勢苗練人數眾多該大臣旣欲制以兵力必須謀定後戰計出萬全方爲妥善著

卽與李世忠相機籌辦並飭朱元興聯絡壽州東南各團練使其一律歸官則該練進退失據勦辦自易爲力前經 皇考大行皇帝諭令賈臻俟潁州蕝事卽行馳赴壽州鎮撫茲據袁甲三奏請飭該署撫帶隊進紮勿株守潁郡自係正辦但賈臻係該大臣幫辦之員如果潁州布置已妥袁甲三卽當就近調度令其前赴壽州豈必請旨飭催若潁郡城外各練均已附苗該署撫正在籌辦亦恐不能前往袁甲三旣稱苗練遽與決裂則兵連禍結復稱非以兵力制之不能就我範圍於應撫應勦機宜究屬毫無定見見在該練要挾無已若再徒事遷就必致養癰貽患該大臣惟當與李世忠竭力籌辦設法殄除並須兼顧壽州不可稍有疏失致干重咎將此由六百里諭令知之○予江西殉難同知王順曾祭葬世職○王子諭內閣朕惟恩同罔極孝莫大於尊親德合无疆禮

特隆於報本頌述必期夫美備顯揚務極夫推崇欽惟 孝德皇
后作配 皇考懋著徽音 坤儀永式乎邦家 懿範允孚於宮
壺朕緬懷 慈德感慕彌殷茲恭上 皇考大行皇帝尊諡宜並

追崇敬上 尊諡用展孝思式垂萬禩該衙門詳察典禮具奏○

諭軍機大臣等本日據崇實奏請飭福濟專防陝南責成駱秉章
辦理四川軍務並陝防兵餉請暫由陝撫借撥各一招駱秉章正
在川北勦辦藍逆一股布置進兵見已身任兼圻事權旣一責無
旁貸所有川省勦賊事宜著卽妥爲調度相機勦辦以期次第廓
清毋任蔓延爲患崇實與駱秉章辦理軍務意見均合著俟駱秉
章到任後卽馳赴川陝交界接辦防堵事宜招募游勇流弊滋多
崇實旣深悉其害到防後卽就見有官兵妥爲布置勿令隨營員
弁添募川勇致令貽害地方至川省經費支絀亦係實在情形所

有防陝兵勇餉項卽著瑛榮暫行借撥俟軍務稍平仍由川省籌撥歸款將此由六百里各諭令知之○劉長佑奏據署思恩府徐引稟報上林縣積匪李錦貴等勾結石逆分出劫掠李錦貴與石逆合攻武緣大山圍潰走上林復率眾數千往撲三里堡該署守分途援剿擒斬偽宰輔陳姓等四五百人李錦貴旋伏冥誅其黨解散該署守乘勝進攻賓州偽官朱進久屢戰皆北勢已不支適黎村積匪宋扶桿糾合旁近數十村土匪前赴救援石達開亦派呂姓賊目帶悍賊二千餘人分攻各團以圖牽掣該署守督飭團紳陸生蘭等分投防剿並出示招安各村土匪獨宋扶桿等恃眾負隅石逆復屯紮襲村廬村等處勢頗鴟張該署守商同遊擊郭承修等添調壯練絕其糧道四面合圍以圍之臣查知附從石逆之貴縣賊匪黃三宣化賊匪李青璇等皆有投誠之意當派同知

陳瀚馳赴賓州會同徐引等籌辦勦撫該員行抵武緣與團紳林源海集練三千人至賓州協勦時黃三已回貴縣隨遣廩生陶光撫諭李青璇情願誘擒逆黨賴積新以自贖詎石逆潛於六月初九日夜間竄往貴縣徐引等當將州城克復見在該逆勢成弩末斷不可任其死灰復燃臣已飛飭潯州府及貴縣文武會合徐引陳瀚等確探賊蹤嚴行擒斬其南甯之橫州鬱林之興業廣東廉州之靈山合浦均與貴縣毗連蔣益澧劉坤一進兵潯州亦相距不遠並卽咨行各路一體堵截勿使奔逸漏網報聞○予廣西陣亡參將李運緒等祭葬世職○癸丑諭內閣朕惟禮先報本尊崇當溯厥由來義在制宜孝思必循夫典則雍正十三年 皇高祖高宗純皇帝恭加 列聖 列后尊諡曾欽奉 聖諭崇先特典後世子孫不得奉爲成式是以我 皇考大行皇帝於道光三十

年恭加上 列聖 列后尊諡於 列聖尊諡已加至二十二字
者未敢復議加上 列后尊諡已加至十六字者亦未敢復議加
上朕紹承大位祇遵 憲典敬念 詒謀其有 列聖尊諡未加
至二十二字 列后尊諡未加至十六字者均宜恭議尊崇顯揚
盛美該衙門詳稽典禮敬擬奏聞尋大學士等議奏加上 宣
宗成皇帝尊諡曰 宣宗效天符運立中體正至文聖武智勇仁
慈儉勤孝敏寬定成皇帝 孝淑睿皇后尊諡曰 孝淑端和仁
莊慈懿敦裕昭肅光天佑聖睿皇后 孝和睿皇后尊諡曰 孝
和恭慈康豫安成欽順仁正應天熙聖睿皇后 孝穆成皇后尊
諡曰 孝穆溫厚莊肅端誠恪惠孚天裕聖成皇后 孝慎成皇
后尊諡曰 孝慎敏肅哲順和懿誠惠熙天詒聖成皇后 孝全
成皇后尊諡曰 孝全慈敬寬仁端慈安惠符天篤聖成皇后

孝靜康慈皇后尊諡曰 孝靜康慈端淑弼天撫聖皇后得旨是

○甲寅毓科奏瑞郡之賊分股竄陷新昌奉新臣札飭水師參將

孫昌國督率礮船沿河巡緝堵其下竄省河之路並飭催劉于潯

作速進攻奉新之賊初欲東竄安義因被擊分股北竄一趨靖安

一趨武甯靖安縣知縣陶黼昌派把總江殿龍帶勇駐紮距城五

里之小山口四月十五日賊繞出小山口後突撲縣城該縣等連

日守禦頻擊卻之二十三日賊復大股麇集圍攻數重東南隅被

礮轟塌縣城遂陷該縣等投水遇救先是武甯縣知縣翁延緒等

以牽牛嶺朱家山係屬要路派把總吳鳳儀等各帶兵團分守四

月十二日賊由爛草湖山僻援崖而入外委張青聞警馳禦賊復

由剡場包鈔張青力竭陣亡十三日賊竄偏縣城對河之南渡街

該縣等用礮轟擊賊勢少卻次日復有另股賊匪攻撲西門南岸

之賊斃水渡河卽由南門援堞而上城遂被陷該縣經親兵搶護以出新昌之賊一股竄至銅鼓營經都司宛春華擊卻一股分竄萬載經知縣魏邦達派優貢廖連城等帶領團勇由新昌港口分道而出遇賊於麻田軍功郭有春先馳入陣連砍悍賊四名各勇三面轟擊殺斃並生擒共三百七十餘名賊遂敗竄二十日各營齊抵西門隔河而軍用礮轟塌望樓一座擊斃守城垛賊十數名賊堅伏不出廖連城令各軍佯退誘其出城賊果傾巢而出各軍回擊賊卽奪橋而奔殲斃及溺死者無數追至城下各軍分攻西南兩門時新昌縣知縣趙樸庭亦率勇馳到該逆因攻圍緊急卽於二十一日夜開門奔竄我軍追殺賊匪多名救出難民千餘人卽將新昌縣城收復其宛春華擊卻之賊北竄義甯州攻撲州城署知州胡傑等帶領兵勇迎擊疊有斬擒詎賊股由南門塌口衝

入州城卽陷該知州遂赴各鄉招集民團以圖收復不料湖北通
崇賊匪悉數竄踞州境之官墩地方與踞城之賊互爲聲援胡樸
派千總黃雲龍等帶勇伏於梅嶺自率團丁屯於來蘇渡口六月
十二日城賊出隊軍功曾省三帶勇衝入殺賊多名梅嶺伏兵悉
起策應賊眾返奔時已革皖南道李元度帶安越軍由湖北通城
馳至卽派吳蘭蕙等直擣官墩賊巢賊不意大軍驟至不戰而潰
次日該道分路進攻先將城外賊壘一律踏平賊卽逃入城中我
軍進薄城下時胡樸宛春華等亦率勇馳至十四日各勇攀堞而
上賊開門向新昌大路竄逸遂將州城克復劉于濬於五月初二
日統帶水陸各軍進攻奉新又分軍並攻靖安賊堅伏不出該道
復調安義團勇及保靖保奉團軍分守要隘自統親兵與知縣鍾
泰等軍攻靖安十七十八等日誘賊出城分軍鈔擊哨官蕭新全

擒其僞將李廷珍各軍乘勢衝突殺斃不少賊遁入城次日復移軍奉新連日環攻賊仍伏匿偵知竄擾湖北武昌逆匪糾合興國大冶等處各股悉數內犯六月十二日該逆大股直撲安義縣城該道移軍援擊連斬紅旗大小賊目三十餘名賊勢大卻悉向台山而逃我軍追至靖安縣仁首地方忽山後伏賊驟擁而出該道分軍鏖戰不料奉新援賊又至勢不可支卽收軍退紮萬家埠因河水淺涸礮船不能得力又退泊新建縣之樂化地方當經臣札飭該道作速相機進剿見在新昌義甯雖經收復而瑞郡及奉靖武三縣賊勢猖獗距省均在二三十里不等雖廣信撫州各有防軍均爲閩浙賊匪所牽掣此外無兵可調省垣頗形岌岌臣見已督飭司道文武各官布置城守事宜並飭嚴查奸宄以靖內訌復疊催鮑超一軍迅速來江援應並飛咨督臣曾國藩就近飭催

上諭軍機大臣等毓科奏逆匪自宜踞瑞郡分陷新昌奉新因江
省防多兵少不敷攻剿以致靖安武甯義甯等州縣先後竄陷省
城爲之戒嚴見在新昌義甯雖經收復而瑞郡及奉靖武三縣踞
匪負隅如故劉于濤以分軍二千人當各路方張之寇深恐不支
廣信撫州各防軍均爲閩浙皖三路賊所牽掣此外無兵可調省
垣勢頗岌岌等語前據曾國藩疊次具奏左宗棠一軍兼顧江皖
瑞州各匪逼近南昌業經飭調副將張運桂老湘營等軍扼守又
有內河水師節節布置劉于濤鮑超等軍分路防剿省垣可以無
虞茲閱毓科所奏情形江西賊勢蔓延必須趕緊剿辦克復各城
著曾國藩左宗棠酌量緩急妥籌兼顧務使江西股匪次第肅清
鮑超一軍曾國藩諒已飛催策應徽州旣經克復皖南軍情亦當
稍紓左宗棠能否分投援應並著妥爲籌度毋誤事機將此由六

百里諭令知之○乙卯以王大臣等援喪服舊章籲請定縞素百日仍素服二十七月○予江西陣亡道員郭式源江蘇陣亡鹽知事蔡祖存祭葬世職○丙辰諭軍機大臣等福濟奏提臣傷病舉發所帶官兵應另派員管帶等語前因川匪竄擾劍州陝兵喫重經福濟奏明將前任提督孔廣順調防幫辦所有固原備調兵八百名由瑛榮等迅飭赴防卽交孔廣順管帶聽候福濟調遣茲據福濟奏稱孔廣順傷病舉發難期速愈前項官兵自應另行派員管帶福濟見已補授雲貴總督陝防已交成都將軍崇實接辦所有前項固原備調官兵八百名著瑛榮卽派員管帶赴防聽候崇實調遣至陝防兵餉急需據福濟奏稱由該撫籌解過銀一萬兩業經支發所餘無幾著瑛榮仍遵前旨由陝借撥俟川省軍務稍平再行籌撥歸款將此由六百里諭令知之○諭據福濟奏崇實

自署任川督接辦軍務毫無布置聽賊奔竄民間有從此爛之謠
又安坐衙齋未出省門一步軍情大事悉委私人使貪功冒餉之
徒濫竽省會陷陣衝鋒之將銜恨疆場占泰轉戰至羅江縣屬之
阜角鋪被賊圍困該署督擁兵不援以致遇害又於堅守孤城戰
功疊著者吝而不賞於安居省城未經行陣之人則不次獎擢以
致將士解體委署州縣各缺該署督必面較錙銖縣丞徐萬有侵
吞公項囊捲回籍被古城紳團阻畱松潘番夷滋事將及一年該
文武困守危城以血書求救崇實視同秦越不發一兵致建昌猓
夷復出巢搶掠道路爲之不通各等語駱秉章見已行抵潼川於
川省一切吏治軍情見聞較確著卽將福濟指參崇實各款詳晰
查明據實具奏毋稍回護原片著鈔給閱看將此由六百里諭令
知之○諭本日據賈臻奏患病增劇瀝情懇請開缺調理一摺賈

臻於苗沛霖狂悖情形疊次陳奏謂必先剿而後可以言撫自係確有見地昨據袁甲三奏苗練蓄意謀叛難再姑容已與李世忠商調朱元興帶隊赴臨一面仍暫與和解俟兵力一齊卽迅速前剿並收撫丁潮臣等股以孤其勢各等語與賈臻所見亦相符合該署撫與袁甲三同辦一事縱使時勢艱難惟當協力同心共籌幹濟斷不可稍存諉卸之心賈臻著賞假一月在營調理毋庸開缺一俟調理就痊潁郡布置妥協後仍卽酌量情形馳赴壽州鎮撫將此由六百里諭令知之○以江西股匪紛竄浙境申諭慶端迅圖埽蕩兼籌建甯邵武等處防務○以浙江採買米石免商船江蘇各關釐稅○是月緩徵直隸永年等五縣被旱被雹新舊額賦旗租山東高唐等二十州縣並德州衛永阜場被旱被雹被風村莊竄地新舊額賦暨倉漕租課山西解霍二州歉收地畝上年

民借倉穀

八月丁巳朔卯刻日月合璧五星聯珠○上詣大行皇帝几

筵前行殷奠禮○諭內閣常清等奏阿克蘇改徵回賦礙難舉辦

請將綿性先行議處一摺綿性於改徵回賦一事不候諭旨輒

行先期出示舉行迫常清等咨令停止仍復固執已見實屬膽大

妄爲綿性先行交部議處仍聽候景廉查辦阿克蘇糧餉章京國

燭印房筆帖式麟齡恃符狡展均著暫行革職歸案嚴訊其章京

烏仁泰稟許綿性那移庫款一節虛實均應徹底根究著景廉一

併秉公研訊據實具奏○諭軍機大臣等薛煥奏籌辦招撫解散

乘機規復蘇州各城一摺據稱常熟賊目錢安邦與蘇州城內之

賊李紹熙均欲乘間投誠束身歸罪永昌鎮團董徐佩瑗擬招集

內河各路槍船豫備同時接應該撫擬分派水陸各隊由高資靖

江鎮江分三路同時進攻所籌一切機宜均尙妥協著卽照所議
妥爲辦理蘇省久淪於賊民不聊生此舉如能得手則其餘郡縣
必當聞風興起倒戈殺賊以應官軍洵爲不可失之機該撫務須
謀定後動不可稍有疏失何桂清係革職拏問屢催解京之員見
在辦理招撫藉其暗中維持著卽飭令趕緊妥辦俟辦有就緒仍
著迅速派員解京毋再延緩將此由六百里密諭知之○諭張亮
基奏鄧爾恆在曲靖被戕傳聞係候補副將何有保之練並有撫
臣徐之銘主使等語徐之銘前奏鄧爾恆係行次曲靖被賊行竊
拒傷身死嗣又奏稱風聞別有情由茲閱張亮基所奏若非徐之
銘暗中授意該練等何敢擅殺封疆大吏此事情節種種可疑著
福濟到任後卽秉公詳察鄧爾恆被害確情據實具奏張亮基片
著鈔給閱看將此由五百里諭令知之○以浙省需餉孔亟飭勞

崇光耆齡文清慶端瑞璜由海道設法迅解○粵逆陷浙江嚴州府城旋復之○戊午官文胡林翼李續宜奏已革皖南道李元度一軍自克復義甯州收復武甯瑞昌德安後卽於七月初二日分兵兩路一路由義甯直擣新昌交界之棗橋地方一路直擣奉新交界之芋竹山地方爲進取瑞州之計連戰皆捷克復新昌奉新兩城復派撥隊伍收復上高敗賊均竄瑞州奉新各營乘勢直進出奉新城三十里大股賊匪列隊抗拒各營轉戰而前初九日逼近瑞州城外適新昌各營亦至夾攻瑞州各勇見援軍趕到銳氣百倍大呼合擊逆賊大敗而奔截殺四五百名逃散數千溺斃無數都司易咸臨羅寅等首先登城新昌各營由北門入奉新各營由西門入署瑞州府知府陸澄帶領團勇隨同攻擊立將府城克復敗賊多竄臨江一帶查僞忠王李秀城自占踞瑞州後分竄上

高奉新靖安安義建昌武甯義甯德安瑞昌以及湖北之通城崇
明通山蒲圻咸甯興國大冶武昌等州縣而以瑞州爲老巢李元
度提得勝之師由楚入江節節掃蕩瑞州一鼓克復關繫江湘鄂
三省大局實足仰慰宸廑各營出力員弁兵勇籲懇恩施准臣
等擇尤保獎上諭內閣官文等奏官軍進剿江西賊匪克復新
昌奉新瑞州等府縣情形一摺李元度一軍自克復義甯後兩路
進取瑞州先將新昌奉新縣城克復進逼瑞州各營會合攻擊逆
眾大敗遂於初九日克復瑞州府城其上高縣城亦經收復勦辦
尙爲妥速著官文等仍飭李元度節節前進將敗竄臨江一帶賊
匪悉數殲除毋畱餘孽所有此次在事出力員弁兵勇准其擇尤
保奏○申諭嚴樹森籌捐京倉米麥勿稍延緩○己未諭軍機大
臣等常清景廉奏葉爾羌參贊大臣措置乖方請派員查辦一摺

葉爾羌爲回疆總匯之區統轄南路八城撫綏回眾最關緊要見在喀什噶爾回匪屢次入卡滋事雖立時撲散而夷情叵測尤虞暗中勾結乘間竊發英蘊於回犯抗差逞兇並不按例懲辦輒照回子經典斬決多名又未奏明辦理實屬荒謬且恐有額外苛斂情事若不認真查辦恐該回子冤抑莫伸激成事端景廉見赴阿克蘇查辦綿性改徵回賦一案卽著就近馳赴葉爾羌將該城上年攤派究係何項銀錢因何不公所斬回子多名係犯何項罪名何以並不具奏新疆禁止演戲何以違禁演唱並此外有無別項情事確切查明據實具奏並著常清景廉傳知英蘊令其先行明白回奏將此諭令知之○廣陝西鄉試中額五名韓城縣學額六名邵陽四名臨潼鳳翔大荔蒲城各三名咸甯渭南三原澄城華三水各二名長安富平鄠岐山寶鷄華陰各一名○予貴州陣亡

副將周學桂祭葬世職○克勤郡王慶惠薨○庚申會國藩奏左宗棠於五月間由廣信回駐景德鎮迎剿建德之賊六月間分軍移紮婺源迎剿閩汀股匪先是池州逆首劉官方一股竄入鄱陽地界距景德鎮僅六十里間左宗棠全軍至鎮卽夜遁走左宗棠派隊由桃樹店橫出截之分路入桐樹嶺遇賊前隊各營自嶺馳下賊眾奪路狂奔我軍躡蹤分追斬馘悍賊百餘名賊知官軍鈔出歸路將斷卽紛紛向建德後河宵遁追至建德三里街斬其落後之賊數十訊知劉逆遠遁遂收復建城而還維時徽州甫復後路空虛婺源介皖浙江西三省之衝左宗棠分軍三千畱守景德親率各營移紮婺源逆首賴贛新一股糾合閩汀匪徒出竄頭起約二萬餘人由常山抵德興之白沙關正派兩營扼王瓜尖賊之前隊已踞德興之新建地方距婺城止四十里後隊繼至道員王

開化等周覽地勢擬由王瓜尖下出中路爲正兵而奇兵由小路
擣新建左宗棠又派撥各隊潛師悉起副將崔大光等由左路進
州同朱明亮由中路進天明遇賊朱明亮大呼陷陣賊從兩旁松
林內鈔出崔大光等突從左路繞出賊後各營乘勢蹙之斬賊數
百追及新建王開化會合進擣賊已棄巢紛竄由新建五里外鳧
水渡河忽見追軍從谷口馳出盡棄礮械而走馬德順率馬隊衝
之賊分由兩岸高嶺攀躋而上我軍從下擊之墜崖落澗死者無
算追殺至白沙關共計斃賊一千有餘生擒八十餘名解散以數
千計所餘紅旗一股仍向浙江開化華埠竄逸德興婺源境內一
律肅清於全局大有裨益出力弁勇仰懇 天恩准其擇尤併入
樂平案內分別優獎以昭激勸 上諭內閣池州逆首劉官方一
股竄近景德鎮我軍攻勦大勝追至建德三里街立將縣城收復

逆首賴績新一股糾合福建汀州股匪竄踞德興之新建地方左宗棠督兵攻擊斃賊無算餘匪向浙江開化華埠竄逸德興婺源境內一律肅清勦辦尙爲出力著曾國藩仍令左宗棠激勵將士節節投効出力員弁兵勇准其彙入樂平案內分別奏請獎勵○諭軍機大臣等曾國藩奏請將上海見泊輪船駛赴上游豫爲練習等語見在籌買外洋船礮以資勦賊而購到尙需時日曾國藩請先將見泊上海洋船令楚軍豫爲演駕洵屬有益著薛煥卽將上海見泊之土只坡洋船迅派幹員剋日押令上駛安慶一帶交曾國藩軍營俾資演習楚軍餉項缺乏一切弁勇工匠口糧仍照向章在於上海支領其損壞輪船一隻並著迅速修理完好駕赴安慶俾兩船更替輪轉以資利用將此由六百里諭令知之○曾國藩奏皖北四眼狗糾合偽輔王璋王玗王等十餘萬眾援救安

慶會國荃一軍但主堅守不主迎勦務使援賊與城中之賊聲息不通庶皖省可期克復皖南徽州六屬除左宗棠在婺源擊退賴逆股匪外其餘各縣各嶺均尙安靜湖北南岸八屬一律肅清北岸德安府城亦於十一日克復上游已有轉機若移得勝之師併力下游則安慶之克尤有把握報聞○辛酉官文胡林翼李續宜奏臣等前派副都統舒保等率水陸各軍圍攻德安府城該逆堅忍死守我軍開挖地道節次轟發地雷雖城身屢次坍塌缺而逆眾立時搶堵六月下旬金國琛等激勵士卒築隄浚濠以四面長圍困其城賊絕其賊援長圍將成金國琛等遂於七月十一日令總兵蕭慶衍等在東西南三路長濠上豫爲埋伏而以團練扼守西北兩路又派副將楊富有扼截北門總兵彭星占扼截西門副將于高勝等斜出西南邀擊總兵彭炳武等分向左右包鈔自率各

營從中衝擊布置甫定城賊由西北門出七八千人且前且卻我軍水陸齊進賊眾披靡忽城賊又出五六千人圖鈔我軍之後楊富有等候賊隊盡出扼其西北歸路會合各路馬步縱橫截殺賊敗盡奔河西伏兵四起急架雲梯一鼓緣登連斬守城悍賊多名立將郡城克復共計斃賊三千四百餘名生擒八百餘名救出難民二千七百餘名舒保金國琛等審察敗賊必分走隨州應山各路當派彭炳武等馳赴應山一帶追截金國琛會同舒保向隨州一路前進追至平林市斃賊千餘沿途復截殺三千有餘十三日至吳家店次日至萬家店皆應山所屬斬馘亦多屍橫遍野統計追剿敗賊共六千有奇內有賊目數十名生擒一百餘名正法餘賊逃匿應山信陽各鄉遂收隊駐營隨州相機剿辦並咨明河南撫臣飭屬一體防剿此次尤爲出力各員謹先行開列懇恩獎勵

上諭內閣逆匪竄踞德安府城經官文等派撥水陸各軍圍攻分路扼守賊由西北兩門竄出馬步官軍左右鈔擊水師登陸接應賊眾潰亂盡奔河西官兵緣梯登城遂將德安府城克復斃賊三千四百有餘復追殺六千餘名勦辦甚屬得手副都統舒保按察使彭玉麟均著交部從優議敘道員金國琛著交軍機處記名遇有道員缺出請旨簡放並賞加布政使銜其餘在事出力員弁兵勇著官文等查明保奏○以廣東湖南湖北各巡撫報解浙餉延緩均下部議處仍飭迅籌協濟○予湖北陣亡遊擊劉復勝祭葬世職○壬戌嚴禁奸商把持糧米市價○予江西陣亡知縣吳朗教諭黎獻祭葬世職○癸亥頒 大行皇帝遺詔○勝保譚廷襄奏逆首張善繼左臨明等擒獲正法後其餘賊首張殿甲張玉懷程學書等續竄西路經臣等派撥馬步各隊跟蹤痛勦將匪眾

殲除陣斃張玉懷程學書生擒僞元帥張殿甲等解營訊明正法
直東交界東西兩路遂無賊蹤惟濮范兩城本爲另股土匪所踞
先經臣譚廷襄派郝上庠將范縣匪首丁聯芳收撫復其城邑而
濮州王來鳳一股人數較眾强悍尤著聞北路大軍擒渠堵穴懾
於聲威亦遂具稟求撫臣等令臬司周士鏗等前往受降王來鳳
暨其部眾俯首聽命當令就近扼防河口嚴杜擒蹤北竄以爲立
功地步惟目下鄆鉅捻氛正熾復有句通南捻由濮范渡河北竄
之信僧格林沁仍紮濟甯所屬之長溝一帶恐致鞭長莫及臣等
以河口最關緊要不敢稍涉疏虞濮州防河事宜卽責成王來鳳
於楊兒莊道口等處守禦范縣卽責成丁聯芳嚴守東關一帶仍
令郝上庠率領原帶東兵扼駐范濮之間兼顧兩處臣勝保並派
參將興山等各帶兵勇分紮莘冠觀城各境互相援應此次辦理

教匪土匪勦撫兼施歷時三月卽經蒞事所有在事文武員弁兵勇容臣勝保稟案覈實保奏其尤爲出力人員謹先行開列籲懇

恩施 上諭內閣官軍續獲賊首正法並派兵收復濮州城池匪

首投誠河北一律肅清辦理尙爲妥速勝保調度有方著交部從優議敘尤爲出力之沂州協副將郝上庠著以總兵交軍機處記名請旨簡放並賞加提督銜其餘在事出力員弁兵勇著勝保查明彙案擇尤奏請獎勵毋許冒濫○勝保奏請叩謁 梓宮允之

○添派惇親王奕諒恭理喪儀○甲子諭內閣道光三十年 皇

考大行皇帝以 皇祖宣宗成皇帝殊諭遺命毋庸 郊配 廟

祔二條 諭令王大臣會同九卿等敬謹妥議嗣照禮親王全齡

等所請仍行 郊配祔 廟並明降 諭旨嗣後 郊祀配位以

三祖 五宗爲定仰見我 皇考曲體 皇祖遺訓定以限制

聖訓煌煌允宜敬謹遵守惟尊崇之典莫大於嚴 父配 天

我 皇考功德昭著洽於寰區薄海臣民咸深欽仰雖 聖諭升配典禮不復舉行朕不忍遽從亦不敢遽定著王大臣會同大學士九卿翰詹科道敬謹詳晰妥速議奏○予河南陣亡府經歷蕭永祥等祭葬世職○乙丑諭內閣戶部奏請飭催各直省趕解京餉一摺前經戶部奏撥咸豐十一年京餉七百萬兩屢經奏催咨催行令各該省分批趕解乃本年籌解寥寥除已解過外未解京餉尙有五百九十餘萬兩之多實屬玩視要需見當部庫需用浩繁之時豈容任意延宕著該督撫鹽政監督等務卽遵照該部奏咨各案迅速籌解儼仍前延玩卽著該部從重嚴參○官軍復貴州獲安縣城○丙寅諭軍機大臣等據巴棟阿馮子材奏密辦蘇常各城內應約會民團進剿已派勁旅一千四百餘名赴上海聽

薛煥調用並先期密商都興阿豫備礮船兵勇以備臨時策應所
籌均尙周妥此舉關係緊要不可稍涉大意巴棟阿等務當不動
聲色密速妥辦並須與薛煥通盤籌畫謀定後動計出萬全方爲
妥善將此由六百里諭令知之○袁甲三奏蒙城官紳倡義驅逐
苗黨苗練從此挾仇屢次勾捻攻城該官紳勦力同心自四月二
十四日至六月初八日七次獲捷每次斬擒或數十人及數百人
不等茲苗練糾邀黨眾在蒙邑城南十三里廟紮營爲攻城之計
練總都司李南華等督帶馬步練勇前往兜剿苗練退敗回營隨
又添馬五百餘匹直撲城垣與兵練相持連日出隊頗有斬擒苗
黨白旗趙玉華率眾七八千由十三里廟東南步步爲營意在斷
絕城圩經官練拌命衝突連踏苗營三座苗練雖眾大半爲勢偏
脅是以無心戀戰紛紛奔逃報聞○丁卯諭軍機大臣等譚廷襄

奏擒匪竄過運河由東平直撲甯陽並曹兗各屬匪蹤徧地請飭
勝保前往勦辦各摺片擒匪由王仲口一帶搶渡運河向甯陽一
路竄去北距省城不過三百里曹單定陶一帶匪蹤肆擾魚台縣
又有擒股續來將與鄆鉅之匪聯合兗州府屬之韓莊沂州府屬
之剡城蘭山等處擒已竄入焚掠山湖兩路均屬緊要譚廷襄現
在畱兵辦理東昌善後親自帶兵折回省城著卽嚴密防守並督
飭各路兵勇聯絡紳團合力防勦以杜賊匪竄繞之路無稍疏虞
至鄆鉅曹單一帶賊匪紛起亟應力圖掃蕩僧格林沁駐紮長溝
勢難兼顧勝保所帶兵勇現在東昌地方著卽飭令帶兵各員就
近前往會合僧格林沁譚廷襄所派兵勇分投截勦毋任北竄將
此由六百里各諭令知之○命五城先期一月設廠煮賑○戊辰
諭內閣胡林翼奏病勢增劇懇請開缺一摺湖北巡撫胡林翼著

賞假兩箇月在署安心調理毋庸開缺湖北巡撫著李續宜暫行署理○諭前因署直隸總督文煜奏絞犯王澐等經欽差大臣勝保提禁緝捕請飭部覈示當經奉 旨交刑部議奏茲據該部奏

請飭勝保將王澐李潰二犯速行解回歸案辦理並請嗣後各省監禁人犯均不准擅行劄調等語所奏甚是監禁罪囚調赴軍營隨征出力事後奏明分別減等原屬一時權宜之計並未著爲成例王澐李潰二犯均係擬絞監禁罪囚軍營乏人不至若是之甚何至劄調罪犯若此端一開各營紛紛效尤恐罹法者希圖藉此免罪國家憲典幾成虛設實屬不成政體王澐李潰二犯著勝保卽速解回監禁歸本案分別辦理毋令逗畱延宕嗣後各省監禁斬絞軍流徒罪人犯均不准軍營帶兵大員擅行劄調以杜巧脫而肅法紀將此通諭知之○己巳諭內閣本日禮部奏朕登極日

期及頒詔典禮一摺覽奏朕心益增感慟惟念、皇考以祖宗
丕緒傳付朕躬勉從所請依欽天監所擇吉日於十月初九日
甲子卯時舉行登極頒詔鉅典各該衙門遵照舊儀敬謹豫備○
庚午諭內閣謹擇九月二十三日辰時恭奉皇考大行皇帝梓
宮回京於二十二日辰時行啟奠禮各該衙門敬謹豫備○辛未
官文會國藩奏逆首四眼狗陳玉城自安慶敗竄後復糾僞輔王
楊輔青率大股匪黨號稱十餘萬自無爲州竄赴英山繞至宿松
希圖攻撲太湖爲救援安慶之計馬步數萬直抵太湖城外山岡
總兵胡裕發等嚴密防守俟賊逼近齊開槍礮傷斃悍賊多名賊
遂潰退隱伏八里岡等處復有賊數萬自龍山宮對岸至塔下分
途誘敵我軍悉力穩守賊始退遁跟蹤追至河干該逆分股由黃
泥港小池驛而逃是役共斃賊千餘名旋據多隆阿咨稱陳玉城

與楊輔青各率大股約六七萬七月初二日由太湖下竄清河三橋頭高樓嶺一帶勢欲勾結桐城股匪圖解皖園多隆阿派撥馬隊赴馬鞍山擇要堵剿僞璋王林逆與吳如哮等率黨六七千由桐城西大路直至挂車河黃汶金亦率賊五六千由桐城東路品亭驛一帶繞至雞公廟麻子嶺多隆阿親率馬步各營疾趨挂車河西以備迎擊賊見兵至勢欲過河猛撲多隆阿派參將譚仁芳等率新中等營迎擊璋逆吳逆總兵雷正綰等率精選等營迎擊黃逆並派馬隊繼之該逆整隊死拒鏖戰三時馬步齊呼直上縱橫鈔擊賊勢披靡追至城根城逆見我軍追逼遂由西南東三門出隊攔阻多隆阿派隊分投抵禦而另撥八營往攻蔣家山賊壘拔其木城二道賊眾奪路狂奔立將賊壘五座踏毀焚燒賊棚二百餘處是役共斃賊三千餘名十二日狗輔各酋分路來犯均經

擊敗追殺多名其會國荃安慶圍師水陸攻城亦平毀城外石壘及東門外月城先後殺賊一千二百有餘城賊已同檻獸惟偵知援賊又到關外已飭各軍慎密戒備力圖克復堅城盡殲醜類報聞○予江蘇殉難縣丞朱青雲祭葬世職○壬申諭內閣上年八月皇考大行皇帝秋獮駐驛熱河該處民情倍深愛戴本年七月十七日龍馭在山莊升遐百姓久沐恩膏感戀悲哀出於至誠見擇於九月二十三日恭奉梓宮回京所有經行各處修治道路橋梁自必爭先恐後朕心深爲憐憫著將承德府及所屬州縣並經過畿內之宛平順義懷柔密雲昌平等州縣明年應徵錢糧全行蠲免著直隸總督順天府尹卽刊刻謄黃徧行曉諭俾眾周知○癸酉上詔大行皇帝几筵前行月祭禮○諭軍機大臣等譚廷襄奏擒匪由甯陽竄入肥城西南折向泰安又東竄

至玉皇山並闌入萊蕪邊界其後股又至甯陽東平河岸仍有大夥屯聚土匪乘機焚掠前在邳州渡河之捻逼近安邱其由海州沐陽北竄之捻已抵莒州各路紛來情形喫重東三府團練尙形單弱恐不足以資抵禦譚廷襄見已折回省城所有守禦事宜務須妥爲布置其先期調派之總兵曾逢年兵一千名青州副都統兵五百名著卽飭令會合團丁分投堵剿毋令賊匪竄擾東三府屬見在河北業已肅清並著勝保親統官兵迅速馳往山東會合僧格林沁譚廷襄所派兵勇分路剿辦以遏該匪北竄將此由六百里各諭令知之○命直隸採辦京倉米麥免所過關津商稅○飭催山東河南漕折等款銀兩○以廣東採買洋米久未覆奏勞崇光耆齡下部議處○廣山西鄉試中額二名○甲戌諭內閣據載垣等奏恭奉 梓宮回京因朕沖齡嗣位合詞籲懇於恭送登

舉後先行啟蹕回京朕受 皇考大行皇帝顧復深恩恭奉 靈
駕回京具有成例何敢不遵何忍不遵惟該王大臣等情詞懇切
若不稍節勞勩轉無以仰慰 皇考在天之靈九月二十三日朕
於麗正門外跪送 梓宮登輦後先赴喀拉河屯行宮跪迎 靈
駕俟奉安 藍殿仍行脯奠禮二十四日行朝奠禮後卽啟蹕於
二十九日還宮所有 梓宮沿途一切事宜著恭理喪儀王大臣
等敬謹將事 梓宮到京之日朕先於德勝門外祇候俟 靈駕
到時跪迎後由間道詣東華門外跪接步送至乾清宮各該衙門
知道○會國藩奏忠逆李秀城竄擾江西經 臣派總兵鮑超督軍
赴援七月初三日由九江拔營前進瑞州奉新靖安安義踞匪聞
風退去由臨江過河盤踞樟樹沙湖豐城一帶鮑超馳赴豐城該
逆已在樟樹搭造浮橋過河至西北岸圖撲我軍鮑超分派馬步

三路出擊鏖戰一時各營奮勇齊進該逆抵敵不住紛紛大敗追殺五十餘里逆屍遍野約共斃賊七八千名洵足寒賊膽而快人心鮑超所向克捷立功最偉可否籲懇 天恩賞賚物件以示優異在事尤爲出力及陣亡各員謹先行開列懇請分別獎卹 上諭逆首李秀城竄擾江西湖北連陷二十餘城盤踞瑞州附近各州縣經鮑超痛加勦洗大挫兇鋒實屬奮勇可嘉著發去白玉搬指一箇白玉喜字翎管一支大荷包一對小荷包四箇交鮑超祇領以示優獎○會國藩奏接據統領安慶全軍卽用道會國荃稟稱八月初一日卯刻官軍用地雷轟倒北門城垣隊伍遡濠登城立將安慶省城克復殺斃長髮老賊二萬餘人該逆情急晁水遁竄又經水師截殺城內悍賊無一得脫四眼狗及偽輔王璋王玕王各股援賊屯紮我軍後濠之外當破城時列隊遠望其膽已落

漸漸退去查安慶省城淪陷已久楚軍圍攻兩載去冬合圍逆酋
四眼狗疊次拌死來援各軍苦守猛戰卒得克此堅城圍殺淨盡
足以伸天討而快人心臣即日前往安慶部署一切先將克復
大概情形馳奏仰慰宸懷上諭本日曾國藩馳奏克復安慶
省城等語逆匪竄陷安慶省城負嵎久踞上年冬間官軍合圍以
後逆首陳玉城疊次來援我軍堅壁力戰卒能克復城池圍殺逆
匪淨盡洵足以申天討而快人心所有詳細情形及在事出力人
員著官文等查明迅速具奏○諭軍機大臣等嚴樹森奏皖捻竄
撲省城被擊向西紛竄一摺安徽捻匪竄撲開封經黃贊湯等督
飭兵勇嚴行堵禦該逆即西趨黑岡竄往中牟鄭州滎澤其由朱
仙鎮分擾水波蘇橋之匪亦向省西合竄蔓及尉氏之夾河集歇
馬營地方嚴樹森於馳回省城後已派馬步兵勇三千人跟蹤截

擊著嚴飭該帶兵員弁繞出賊前實力扼剿毋任紛竄惟該匪眾至數萬應如何添調勁旅分投兜剿使匪蹤不至再有蔓延並著嚴樹森會同毛昶熙熟籌辦理至該匪於開封等處並未大受懲創輒行西竄自係垂涎山陝兩省著英桂瑛榮於各該省毘連河南省各要隘地方嚴密防堵毋令逆匪得以竄入擾及完善將此由六百里各諭令知之○署貴州巡撫何冠英卒予祭葬○賞江忠義二品頂帶署貴州巡撫由丁憂按察使署未到任前以提督田興恕兼署○以河南勦擒屢捷開復團練大臣毛昶熙降畱降調處分○予江西陣亡知州袁觀豐祭葬世職○乙亥諭軍機大臣等恭親王奕訢等奏據俄使巴里玉色克稱該國槍礮已抵恰克圖該使復派精於製礮之斐利偏廓前往會同演製等語由京派往演習之官兵人等已據慶昫等奏稱分起出口計日可到庫倫著色

克通額於此項官兵到齊後卽揀派體面曉事之員前往恰克圖
安爲照料該官兵等演試槍礮將此諭令知之○丙子以承辦南
河清理工程各案逾限未結前署河道總督王夢齡下部議處○
以浙江廣東軍需延不報銷王有齡鑄級畱任勞崇光耆齡下部
議處仍嚴飭之○廣湖南鄉試中額三名長沙府學額十名黔陽
四名益陽澧各三名甯鄉衡山祁陽新化武岡武陵龍陽各二名
湘鄉攸安化清泉邵陽沅陵永順芷江桂東靖會同慈利各一名
○予江西陣亡在籍知州陳麟昌祭葬世職○丁丑諭內閣翰林
院應行保送御史見在合例應保者人數無多著將會經保送未
經記名人員與應行保送之員一體保送○戊寅以水陸官軍克
復廣西潯州府城賞按察使蔣益澧三代一品封典道員劉坤一
父母一品封典餘加銜升敘有差○予陣亡遊擊王佐朝等祭葬

世職○己卯譚廷襄奏查大股南捻三四萬人由泰安至肥城長清境內分三路並進前派駐紮開山楊家臺杜家廟各營均當其衝該匪先到開山闖出山口楊家臺杜家廟二營整隊往援該匪另股已由肥城長清衝過營盤直撲省城大路營總烏爾貢扎布遊擊緒綸由杜家廟帶領馬步繞出賊前臣復添派楚勇在距城十二里之段店迤西迎擊當將賊隊壓下退至距城二十里之丁家山口屯駐惟賊勢過眾勢將逼城臣屬侍郎杜翻與司道等官嬰城固守臣親駐西關土圍以內飭副將常存等嚴密防備遊擊傅萬清等督帶楚勇力遏兇鋒十四日該匪撲犯土圍我軍列陣以待該匪知難攻取遂潛至城北並無土圍之處涉水徑渡復在西面之靈官廟十五殿南面之二里壩東面之山水溝等處爬圍復攻王家林營盤均被兵勇擊退十五日該匪大隊排列城南千

佛山下駐紮楊家臺之參將保德帶兵由山僻小徑繞出與二里壩圍內兵勇對面轟擊斃賊數百其赴各村焚掠者亦被團練隨地截殺竄至齊河張村渡口紮筏希圖搶過又被半渡擊散該匪不能抵禦逐漸東竄十六日又有大隊繼至我軍開礮向南橫擊斃賊無數匪眾亦卽東竄臣先咨調登州鎮總兵曾逢年帶兵千名於東三府適中地方豫圖截剿並令青州副都統恩夔挑兵五百名以資守護見在僧格林沁業已親督大隊追剿卽日進省兩面夾擊自可掃除羣醜其東平及鄆鉅等處尙有匪眾屯聚恐其竄越仍當督率將士竭力嚴防容再查明擇尤覈實保奏 上諭內閣捻匪搶渡運河由泰安等處分路並進闖出開山由肥城長清直撲山東省城大路逼近城下撲犯土圍均經兵勇擊退斃賊無數該匪紛紛東竄著譚廷襄嚴飭總兵曾逢年等認真截剿毋

任蔓延在事出力文武員弁著譚廷襄查明覈實保奏○庚辰諭
內閣崇實奏松潘番情反覆派員前往相機剿辦一摺松潘逆番
占踞要隘時撲廳城總兵聯昌及同知張中寅督率兵團守禦該
番乘喇嘛運稿賞茶包之隙由東北兩門撲入焚殺該總兵及張
中寅分門堵禦眾寡不敵張中寅於東門督隊手刃數賊立時陣
亡鎮廳衙署悉被焚燒張中寅全家殉難聯昌家屬亦皆被害逆
番戕官踞城殊堪痛恨著駱秉章督飭聯昌及副將奎林等調募
兵勇扼要堵剿務將番眾悉數殲除克復松潘廳城毋稍延緩同
知張中寅著駱秉章查明請卹該城文武下落著一併查明具奏
○辛巳官文會國藩胡林翼李續宜楊載福多隆阿奏安慶圍師
自七月十三日攻破北門外賊壘後城賊自是日蹙狗逆陳玉城
糾合偽輔王楊逆及洪逆朱逆等共四五萬人於十六七八九等

日陸續入關在關口毛嶺十里鋪一帶紮營四十餘座散布山岡城賊亦列隊西門遙遙相應二十日該逆出全隊撲我後濠分十餘路而來其撲西北一隅者勢尤洶湧我軍不動聲色俟其偏近始以槍礮轟擊斃賊無數二十一日仍猛撲如前次日我軍修築礮壘一座占住要地而毛嶺十里鋪及關口之賊傾巢齊出其撲中路者約萬餘人直至新壘之下我軍以槍礮三面夾擊傷斃之賊屍滿田隴狗輔兩逆酋復親自督陣賊退卽揮刃砍之猛撲十餘次我軍新營已成賊始卻退未幾而後隊之賊仍大呼齊進會國荃督率各營併力穩擊自夜達旦其犯西北兩路者亦猛撲數次經彭毓橘等擊退是役也相持半日一夜之久賊之精銳實傷斃三千餘名援賊兇鋒大挫二十三日至二十八日每夜輪撲後濠各營均嚴爲戒備水師亦由鹽河口開礮橫擊斃賊不少該逆

既屢挫於西北又欲從中路衝突因於菱湖北岸陸續築壘十餘座二十九夜賊以大隊撲壘而暗用小划送米入城蔡國祥率礮船阻截概行搶奪其撲水邊營壘者亦經朱洪章等擊退三十日曾國荃於菱湖南北兩岸紮營四座派人駐守與水師互相聯絡賊划愈難出入城中米糧盡絕賊益慌亂逆首張潮爵等將由水路逃遁適我軍所挖地道業已開竣裝藥五更火發轟塌北城牆垣曾國荃分派隊伍登城與水師兩路夾擊西門二壘之賊經後左副後振字義字各營殺盡東門之賊經新後吉左湘恆智字長勝各營殺盡北門正街一路之賊經中軍嚴字制字和字護軍及馬隊各營殺盡其從百花亭逾城逃出之賊經水師營官萬化林蔡國祥派隊殺盡眾賊首均死於亂軍之中八月初一日卯刻克復安徽省城其菱湖援賊數壘亦經長勝吉左智字各營攻撲焚

燒殺賊千餘陳楊各逆見我軍攻克城垣俱爲膽落退遁集賢關
外臣等查安徽省城淪陷九載楚軍自克九江後節節掃蕩旋於
去歲進兵水陸合圍城內之賊不下三四萬逆酋陳玉城糾合南
北兩岸悍賊疊次上竄圖解官軍之圍其桐城援逆經臣多隆阿
力挫兇鋒該逆未能合併復經臣等督飭陸師痛剿援賊水師扼
斷接濟會同荃率圍軍穩守長濠加勁環攻絕其援應賊之狡計
愈窮此次英輔玕朱四逆酋入關號稱十萬各營全力堵禦前後
傷斃賊眾六千餘名迨克復省城之日除釋放婦女老幼數千人
外殺斃溺斃之賊實數一萬六千有奇東南大局漸可挽回所有
水陸各營統領將官謹開單籲請 聖恩獎敘其在事尤爲出力
及節次陣亡各員弁容俟查明分別彙保請卹官文胡林翼李續
宜奏統領安慶全軍卽用道曾國荃管帶湘恆等營國子監學正

銜候選訓導曾貞幹均係兩江督臣曾國藩胞弟國荃隨同該大
臣出師軍營疊次著績前因曾國藩帶兵援浙派令圍攻安慶臣
等以圍師太單增其弟貞幹所部千人合同剿辦該員等苦守苦
戰力禦援賊十餘萬潛挖地道攻克堅城逆匪無一漏網智勇兼
施厥功甚鉅程學啟改過自新奮勇圖報數月內屢次血戰殺賊
最多實爲軍中有用之才仰懇 聖恩均予獎敘 上諭內閣前
據曾國藩奏克復安慶省城當經諭令官文等將詳細情形查明
具奏本日據官文會國藩等奏攻剿詳細情形並將勞績最著各
員開單呈覽欽差大臣大學士湖廣總督官文欽差大臣兩江總
督曾國藩調度有方均堪嘉尚官文著加恩賞加太子太保銜曾
國藩著加恩賞加太子少保銜湖北巡撫胡林翼首先畫策身親
督剿厥功甚偉著加恩賞加太子太保銜並賞給騎都尉世職安

徽巡撫李纘宜前經隨同籌辦著加恩賞穿黃馬褂福建水師提督楊載福福州副都統多隆阿疊著戰功均著加恩賞給雲騎尉世職官文等另片奏會國荃等於圍攻安慶智勇兼施懇恩鼓勵等語道員曾國荃著賞加布政使銜以按察使記名遇缺提奏並賞穿黃馬褂以示優獎訓導曾貞幹著免選本班以同知直隸州知州儘先選用並賞戴花翎程學啟奮勇立功著以遊擊儘先卽選並賞戴花翎○江西巡撫毓科奏查義甯擊敗之賊竄陷新昌上高縣城李元度督軍進剿連獲大勝立將兩城次第克復復派隊進剿奉新殺賊無數各營進薄城下賊眾宵遁縣城亦卽克復瑞州踞逆聞風膽落又因鮑超大軍將至無復負隅之意李元度乘勢進兵與賊接仗殺斃四百餘名該逆大敗向臨江大路竄去府城克復賊自瑞州竄出後分擾清江分宜各縣併攻臨郡知府

丁峻帶兵扼守臨江而以礮船沿江截擊轟斃賊匪甚眾賊始解圍渡河而去遂竄踞清江之樟樹鎮臣飛飭安肅道劉于潯統帶內河水師泝流而上擊賊於薛家渡等處殲斃約千餘名賊由樟樹鎮下游偷渡潛竄拖船埠分股下竄豐城遊擊劉勝祥迎頭截擊頗有斬擒時鮑超已抵豐城對河該逆潛渡河西欲襲其後鮑超派隊分中左右前進賊大隊約二萬餘人前來拒敵鮑超又遣總兵宋國永等由山後鈔襲揮令各營分途衝入鏖戰一時賊眾大敗追殺五十餘里斃賊約七八千名豐城西北岸賊壘一律踏平東岸之賊亦悉驚潰劉于潯遂乘勢收復樟鎮查鮑超自入江以來威望所加賊已望風而遁茲由瑞州跟蹤追剿一經指揮卽獲大捷實足以褫賊魄該鎮智勇過人忠誠夙著轉戰江皖所向無前洵不愧爲名將惟係提鎮大員應如何優加獎敘恭候 聖

裁李元度於克復義甯後乘虛直擣五日之內連復四城厥功甚偉擬請賞加布政使銜其革職拏問之案可否免其查辦在事出力員弁兵勇容臣查明擇尤酌保上諭瑞州逆匪自李元度等擊退後竄擾清江分宜各縣並攻臨江復竄至清江之樟樹鎮分股下竄豐城鮑超三路進剿斃賊七八千人豐城西北岸賊壘一律踏平乘勢收復樟樹鎮辦理甚爲得手湖南綏靖鎮總兵鮑超著交部從優議敘李元度著賞加布政使銜其徽州失守之案應否免其查辦仍著會同藩臬具奏所有此次出力員弁兵勇著毓科會同官文等查明擇尤保奏○以黔軍追剿粵逆逼近川境飭駱秉章會剿○予江西殉難知縣趙樸庭祭葬卹職○追予安徽三河殉難道員曾國華諡愍烈○壬午以十月初十日聖母皇太后聖壽節尙在百日內奉懿旨停止行禮○諭內閣聯捷

奏勦辦鐵腳寺敗匪大獲勝仗生擒逆首全股就殲一摺匪首李遷聚黨焚掠由鐵腳寺桑柳村一帶竄赴東明縣境經該縣知縣易煥書號召團勇會合進勦斬殺無數生擒逆首李遷一名賊目薛占元等七名匪黨二十三名搜獲餘匪八名訊明正法全股悉就殲除辦理尙爲安速所有在事出力官紳著聯捷擇尤酌保毋許冒濫○諭軍機大臣等苗沛霖黨與四出兼之北捻西犯潁壽正陽情形均極喫重袁甲三已決意主勦前據奏稱朱元興於八月初旬起程見在計已可到黃鳴鐸等正在壽州與苗練開仗卽可乘此機會助以兵力並會合反正民圩內外夾攻殲除巨醜以免蔓延博崇武張學醇辦理苗練專事遷就殊堪痛恨見在壽州人心固結攻勦苗練已經得手豈可仍令博崇武等在彼掣肘以致羣情解體如果該員等袒護苗練辦理不善卽著袁甲三李世

思嚴參懲辦並迅催朱元興一軍趕到設法進剿仍須嚴防該匪渡淮北竄毋許貽誤捻匪距潁州甚近賈臻雖兵勇止數防守亦當設法截剿不得任該逆來去自由致成坐困之勢將此由六百里各諭令知之○諭捻匪大股竄擾鞏洛欲圖北竄非迅速剿除恐益滋蔓嚴樹森接奉前旨諒已派調勁兵前往剿辦著卽飭令帶兵員弁繞出賊前迎頭兜剿毋令逆蹤得以北犯並不得任令西趨擾及山陝完善地方防河爲聯捷專責見旣馳抵孟縣卽著將賈營迤西各河口嚴密布置實力籌防仍咨令段晴川等將馬營口等處防務認真辦理儻該匪敢行搶渡卽著會同嚴樹森派出官兵協力剿擊不得稍涉疏虞將此由六百里各諭令知之○癸未諭內閣大學士九卿會同議上 皇考大行皇帝 尊諡曰

顯皇帝 廟號曰 文宗上配 列祖同爲百世不祧之廟欽

惟一皇考聖德照臨萬幾明燭 覃敷聲教寢寓欽承仰 至德之無加實羣倫所共戴今廷臣所擬詳愼公允於 皇考綏猷建極之宏模洵相符合深協朕懷此天下萬世之公論非朕一人哀慕尊崇之私願亦非臣下尊親頌美之私情也謹據所奏恭上尊諡 廟號所有應行典禮該部敬稽成例以聞○諭軍機大臣等前因壽州情形緊急曾諭官文等撥兵駐紮三河尖以壯皖軍聲援嗣據李續宜覆奏宜先復安慶而後可圖進取見在壽州自正月被圍已經七月苗沛霖與壽州團練尋仇起衅追殺死徐立壯等後仍不肯撤圍必欲攻破壽州袁甲三派張學醇博崇武前往和解而壽州紳民謂其袒護苗練並因苗沛霖擅殺蒙時中以致州民憤激死拒苗沛霖受粵逆僞職叛蹟顯然斷不能再事遷就袁甲三已專意主剿而苗練人數眾多能否剿辦尙未可定此

時壽州無餉無兵兼無守將孤城岌岌可危昨據賈臻兩次奏報探聞楚軍克復安慶後並克復桐城舒城廬江各城楚軍東征本爲肅清皖北諸城次第克復或分撥勁旅進援壽州或駐兵六安三河尖一帶聯絡聲勢亟須早爲布置使苗練有所顧忌著官文會同藩胡林翼李續宜通盤籌畫迅速辦理楚軍克復安慶後勢如破竹必能乘此聲威剿除皖北逆匪也將此由六百里加緊各諭令知之○諭苗沛霖圍攻壽州袁甲三屢經奏稱派兵赴援至今尙未見到半載以來遲疑不決卒至撫議不成苗練愈橫賈臻將壽州兵勇悉行調赴潁州是誠何心苗沛霖已受粵匪僞職攻陷正陽霍邱叛逆已屬顯然見在該城危急萬分著袁甲三速行派撥水陸各軍並迅催朱元興一軍交李世忠親行統帶馳赴壽州將逆練迅速剿辦立解城圍仍須接濟壽州軍餉毋得意存玩

延賈臻見駐潁州未能分身其前調壽州兵勇仍嚴飭該將弁管帶折回以利攻剿該大臣等皆身受 皇考大行皇帝重恩且袁甲三身爲統帥專辦皖北軍務賈臻有地方之責壽州設有疏虞朕惟袁甲三等是問決不寬貸至按察使張學醇拘執練董送往苗營總兵慶瑞擅赴南路駐紮尹善廷是否前往潁州博崇武赴苗營後作何舉動該員等種種趨附苗練意存助逆實堪痛恨卽著袁甲三李世忠賈臻迅速查明嚴行參奏盡法懲辦毋許稍事徇隱將此由六百里加緊各諭令知之○展河南鄉試於同治元年舉行○頒 大行皇帝遺詔於朝鮮國○廣江西樂平彭澤學額各十名○乙酉諭軍機大臣等勝保奏統籌南北軍務並酌擬進剿東豫賊匪情形各摺片此時情形急應嚴防該匪北竄著該大臣督帶官兵先將畿南一帶地方認真堵剿嚴扼濮范賊匪竄

入直境之路俟直東交界地方剿辦一律肅清再候諭旨遵行王
天保所帶王來鳳降眾昨據嚴樹森奏該大臣飭往歸德本日據
稱赴曹單扼紮著該大臣迅速撤回並將王天保解往豫省交嚴
樹森歸案審辦建昌駐紮黑龍江馬隊雖有一千名惟該處附近
地方尙有土匪正資彈壓勢難分撥見在恭奉 梓宮回京古北
口官兵正需護送亦難調往該大臣惟當就見有兵勇力扼畿南
地方毋令該匪闖入直境是爲至要將此由五百里諭令知之○
官文會國藩奏自安慶得手後桐城踞逆已成孤注多隆阿親率
馬步追剿援賊派副都統穆圖善力攻桐城卽於八月初三日克
復蘄州踞逆亦經 臣等添調水陸各軍於初九日克復斃賊甚多
今將克復日期先行馳報李續宜奏安慶克復後僞英王陳玉城
僞輔王楊輔青等聚集逆黨由宿松上竄圖犯鄂疆 臣於十三日

拔營馳赴黃州相機攻剿以期早清鄂境卽行赴皖均報聞

九月丙戌朔恭上 母后皇太后徽號曰 慈安皇太后 聖母

皇太后徽號曰 慈禧皇太后○丁亥諭軍機大臣等前據勝保

奏統籌南北軍務酌擬進剿情形當經諭令該大臣先將畿南一

帶認真堵剿俟直東交界肅清再候諭旨遵行茲據譚廷襄奏范

縣濮州一帶有鄆鉅會匪過河潛匿擊退後盤踞馬陵集一帶藍

白花三旗股匪約計一萬數千人陸續過河四散屯聚直隸清豐

等處亦有賊蹤南捻黃旗又至單縣新泰等處土寇縱橫請飭勝

保迅赴東昌督辦以防北竄等語鄆鉅會匪勾結捻匪渡河其勢

甚熾雖經譚廷襄派令郝上庠移營嚴防並調宋憬詩降眾協助

復經勝保所派道員陳顯彝添調官兵前往鈔擊尙恐匪眾兵單

著勝保迅赴大營督飭將弁會同譚廷襄派出兵勇分投截擊毋

得任賊紛竄並著譚廷襄嚴飭郝上庠等認真截剿如臨敵退縮
卽嚴參懲辦捻眾東竄東三府地方緊要總兵曾逢年是否帶兵
迎剿副都統恩夔見在有無布置著該撫嚴飭該總兵等分投堵
截勿稍疏懈將此由六百里各諭令知之○己丑調瑞常爲工部
尙書綿森爲刑部尙書○辛卯會國藩奏安慶省城經水陸官軍
克復後提臣楊載福卽派總兵王明山黃翼升率水陸各營進攻
池州王明山令趙三元等於八月初五日繞城攻擊該逆以槍礮
抵拒趙三元率水師奮勇登城賊不能支遂開西門而遁適王明
山黃翼升率水陸各營趕到殺賊甚多立將府城克復見派韋志
俊帶陸師四營守之仍畱水師二營護之王明山黃翼升卽日進
攻銅陵臣查僞右軍劉官方盤踞池州與安慶相爲犄角老巢屢
攻不破內則堅守石埭太平阻徽師進兵之路外則上犯建德鄱

陽爲江西北邊之患今幸克復安慶池州亦相繼而下從此皖南軍務當日有起色足以仰慰 聖懷 上諭內閣此次官軍進攻

池州殺賊無算立將府城克復辦理甚爲得手著會國藩卽飭水陸各軍分路進攻將失陷城池次第收復○撥漕折銀五萬兩濟

會國藩軍餉○以彭蘊章署左都御史

前大學士

○壬辰諭軍機大臣

等前因嚴樹森奏已革遊擊王天保挾嫌殺斃守備張大愷各情諭令勝保將該革員迅解河南歸案審辦本日據勝保奏張曜與王天保爭功不睦擅行具稟嚴樹森參革由於偏聽張曜一面之詞等語王天保所犯之罪情節較重周士鏜詢據王天保稱張大愷實係陣亡亦係該革員一面之詞勝保何以率行聽信該大臣身爲統帥於王天保殺斃張大愷一案必欲曲爲袒護甚屬非是著仍遵前旨將王天保迅速解赴河南省城交嚴樹森歸案審辦

如果原參錯誤諒嚴樹森亦不敢稍有回護其王來鳳新降之眾並著妥爲安插儻滋生事端朕惟勝保是問將此由五百里諭令知之○諭明緒奏查明阿勒坦沙拉父子實在下落一摺阿勒坦沙拉父子下落經明緒飭委營長穆隆阿等前赴俄羅斯國所屬之哈薩克游牧地方訪查據該阿哈拉克齊霍佳凱聲稱阿勒坦沙拉並伊子均在俄羅斯國所屬庫庫奇塔普地方居住著常清卽行文俄國西錫畢爾衙門轉查阿勒坦沙拉父子是否在該國所屬地方居住以期得有確實下落將此諭令知之○予直隸陣亡知縣王懷清山東殉難在籍知縣卞祈年祭葬世職○甲午袁甲三奏據李世忠稟報遵臣札調督同朱元興等帶隊起程已行抵來盱交界之津泥地方不日可到壽州臣以苗沛霖圍壽之隊至今未撤並將前竄豫境之苗憬開等夥黨調回抽換隊伍層層

圍困其意總欲占踞壽城以遂其蠶食之計若不立加痛勦恐煽惑日多西趨北竄大局更難收拾臣數月以來暗中布置散其黨與沿淮圩練均爲我用其未敢遽然背苗者均懼其威餒苟且順從我軍必須先據要害示以必勝之勢方可鼓舞人心查懷遠縣地臨渦淮爲上下游適中之地苗練在彼積糧一萬餘石爲後路接濟且有窺伺東北之意爲今之計惟有乘其不備先將懷遠扼守與蒙城團練聯絡一氣斷絕糧道並遏北竄之路一面號召民圩聲罪致討水陸直趨壽州會合夾擊以解城圍並出示曉諭止誅首惡苗沛霖一人其從前隨同辦練剿賊有功曾授官職者果能倒戈殺賊一概免其深究以示我皇上寬大之仁而潛消其反側則苗沛霖勢成孤立雖狡詐多端不難平定矣上諭軍機大臣等前據賈臻奏苗練欲糾捻匪攻破壽州並據翁同書奏苗

練圍城愈急博崇武等潛赴苗營壽城無兵無餉危在旦夕各情
形節經諭令袁甲三乘壽城紳民與苗練開仗迅催朱元興一軍
交李世忠統帶馳赴壽州剿辦本日據袁甲三奏苗練怙惡擬卽
日進剿一摺自係尙未接奉前寄諭旨苗練未撤圍壽之隊兇燄
頗張袁甲三擬先將懷遠扼守與蒙城圍練聯絡斷絕糧道並扼
北竄之路一面號召民圩聲罪致討水陸直趨壽州並出示曉諭
止誅首惡所籌均尙妥協著卽照所擬迅速妥爲辦理李世忠朱
元興均已行抵來盱交界之津泥地方著遵前旨將朱元興一軍
交李世忠親行統帶星夜馳赴壽州立解城圍壽州被困已久危
迫萬狀袁甲三身爲統帥責無旁貸必須計出萬全一鼓殄除儻
徒託空言坐失機宜朕惟袁甲三是問決不寬貸將此由六百里
諭令知之○召張亮基來京○予四川殉難知州黃家聲祭葬世

職○奉天金州地震○乙未諭內閣前據御史卞寶第奏失守地方免罪人員續保官階請飭議定限制當經奉 旨交吏兵二部

嚴定章程茲據吏部等部遵議覆奏並將嚴定罪名處分章程開單呈覽著照所議嗣後各路統兵大臣各直省督撫於地方失事人員均著照例覈辦非素得民心及實能奮勇殺賊者概不准率請留營效力其失守城池隨同克復之員止准奏請免罪續有勞績准其請給虛銜頂帶三次得有勞績方准奏請開復原官仍著補交捐復銀兩不准奏請免繳俟軍務完竣送部引見以示限制其武職失守城池罪名處分卽著照兵部見定章程辦理○諭駱秉章奏官軍大破藍逆踴毀賊營七十餘座川北肅清一摺藍逆自東嶽廟餘壘被毀後移踞西山觀青衣壩一帶負嵎抗拒我軍自浮橋造成後卽分三路繞出觀後分投攻剿將山腰之賊擊退

將近西山觀後賊突出萬餘人迎拒我軍設伏繼進殺賊二三千人總兵胡中和等同時趕到奮擊兩時之久斃賊數千賊遂敗奔山岡我軍乘勢擁上焚燒賊巢左營復從旁徑繞出賊前賊大驚潰焚其二壘右後各營亦同時攻破西山觀各壘藍逆勒馬退奔各軍分路追殺遂將林壩村青衣壩大小賊壘七十餘座悉數踣平斃賊四萬餘人此次賊勢數倍官軍竟能以少擊眾獲此大捷川北所屬已無賊蹤路秉章調度有方深堪嘉尚仍著督飭將士將竄往綿竹一帶之藍逆餘黨乘勝剿洗淨盡勿畱餘孽○丙申田興恕奏八月初一日據總兵楊巖寶等稟稱仁懷地界疊經該鎮等督兵接捕已無賊蹤乃粵匪分路潛竄該縣界接川省綦江永甯等縣見在跟蹤追剿等情臣當嚴飭楊巖寶等督兵分路追殺不得存驅賊出境之見復據楊巖寶等稟稱賊至桐梓縣屬之

放牛坪一帶專由僻徑趨行我軍隨後追剿該匪不敢接仗漫山狂奔被我軍殺斃三百餘名滾巖跌水死者又數百名復追至牛渡灘該處左右皆山十分險峻前阻溪河我軍從後掩殺計斃一千有餘其僞總制朱洪新回竄桐梓縣經署知縣胡鑑會合遵義團勇迎剿斃匪數十名適副將周洪順帶隊踵至合力奮擊立將朱洪新槍斃陣斬二百餘名復經官軍將李添亡全股殲除淨盡餘匪由擔子山竄涪州白馬鎮臣伏查粵匪蓄意窺川實非一日上年由泗城竄入黔界連陷州廳褻脅甚眾屢經臣督飭鎮將將城池一律收復斬馘萬餘招降無數該逆攻撲安順安平平遠黔西大定畢節仁懷桐梓等府州縣均爲我軍奮力擊敗臣前於賊竄仁懷時卽派總兵吳安康選帶勁旅三千赴川會剿乃黔省鎮將甫欲入川因軍糧無出未能過界再四籌思涪州下達荆宜旁

偏酉秀且與黔省婺川思南印江等處毗連設再勾結敎匪剿捕
愈難兇飭吳安康一軍由婺川一帶探明賊蹤攔頭截剿其楊巖
寶各軍已陸續撤回惟臣受命剿賊一匪未淨卽屬督剿不力相
應請旨將臣交部議處至楊巖寶等未能立時攔截致令餘匪竄
入川疆除避賊行走之都司劉金龍謝光才實屬有心貽誤業經
臣按軍法從事以昭炯戒外請旨將古州鎮總兵楊巖寶撤去固
勇巴圖魯名號拔去花翎總兵吳安康周洪順梁正秀一併革職
均仍畱營剿賊以觀後效儻再不知奮勉卽由臣嚴參治罪上
諭內閣粵匪自貴州仁懷地界潛竄桐梓縣屬之放牛坪一帶遁
逃我軍分路追剿斃賊多名其李添亡一股亦經殲除淨盡餘匪
由擔子山竄至涪州白馬鎮田興恕統兵剿賊致令餘匪闖入四
川界內究屬督剿不力著交部議處總兵楊巖寶等未能立時攔

截除都司劉金龍謝光才業經正法外古州鎮總兵楊巖寶著撤去固勇巴圖魯名號拔去花翎總兵吳安康副將周洪順梁正秀均著革職畱營效力儻再延玩卽著嚴參治罪○予四川陣亡參將文梅勝祭葬世職○丁酉諭內閣樂斌多慧奏撒匪悔罪輸誠地方肅清官軍凱撤一摺甘肅循化等廳屬撒拉回匪竄擾西甯等處被擊回巢後樂斌多慧分別調派官軍扼紮要隘訂期進剿多慧復親赴平戎驛居中調度該匪震懾兵威將首犯韓五十二縛獻業經多慧訊明正法並據該回眾賠交贓錢呈繳軍裝器械不敢再生事端地方業已肅清所有在事文武員弁著樂斌多慧擇尤奏請獎勵無許冒濫○廣江西新淦縣學額八名山西徐溝一名○己亥諭軍機大臣等本日據嚴樹森奏西竄捻逆經官軍截擊獲勝悉數遁回皖巢近省郡縣已無賊蹤一摺皖捻屢次竄

入豫省蹂躪地方已成熟徑雖經官兵擊退並未能大加懲創該匪飽掠而歸難保不去而復來該撫前奏通籌豫省形勢分路布置此時捻匪回巢亟宜趕緊籌畫於歸陳等處嚴密扼守以固邊防所募楚勇五千人著卽迅速催提到豫後勤加訓練俾成勁旅其餘旗店附近尙有股匪游駛圖撲南陽鄆城會匪尙在顏集一帶著該撫迅飭帶兵各員痛加勦洗勿畱餘孽將此由六百里諭令知之○庚子諭內閣崇實奏勦平分股逆匪邛雅地方一律肅清一摺四川何逆股匪自大邑擊敗後竄至名山屢次攻撲雅州郡城均經建昌道鄂惠等督兵擊退其分竄蒲江之賊經總兵黎得盛勦殺淨盡逆首孔三大耶經邛州鄉團擒獲正法鄂惠等統帶兵勇復由金閣進攻擒斬無算當將名山縣城克復並沿路截擊敗匪斬殺殆盡雅安邛州蒲江一帶均已一律肅清其嘉定敘

州健爲等處零匪亦經該地方官督團擊敗餘匪逃竄勦辦尙屬出力所有在事出力員弁兵勇及各州縣守城禦賊文武官紳著駱秉章會同崇實擇尤保奏毋許冒濫○諭駱秉章奏請將貪汙不職之藩司副將分別懲辦等語四川布政使祥奎性情貪鄙聲名狼藉著卽革職交駱秉章嚴行查辦署督標中軍副將張定川狡獪刁詐侵吞官項著革職拏問按律懲辦以儆官邪○諭軍機大臣等據駱秉章奏祥奎履任六七年賄賂公行於缺分委署軍功保舉防堵報銷均需索使費復任聽幕友家丁訛索辦理津貼每兩加派銀五兩名爲按畝捐輸以致渠縣等處地方聚眾圍城張定川狡詐柔佞省城武職非其義子門生卽所親厚督署內外徧置私人管造軍械火藥等項多有侵吞種種貪鄙情形實堪痛恨著駱秉章查明祥奎婪索贓款詳細追究津貼之外加派五兩

是否歸公如有侵蝕入己情事卽奏請治罪並查明訛索之幕友家丁嚴訊究辦渠縣廣安達縣巴州營山東鄉南江通江各州縣如何激變情形並著查明具奏張定川製造軍裝等項諸多不實顯有侵吞情弊著該督認真嚴訊其子張廷奎及張正倫戴廷超劉華之類皆其私人著一併查參將此由六百里諭令知之○諭賂秉章奏川北一律肅清崇實可毋庸更赴防所等語藍逆巨股疊經官軍痛剿見竄什邡之李家碾等處川北一帶業已肅清崇實著卽赴成都將軍本任毋庸赴防陝南見在雲南軍務未竣著福濟速赴雲貴總督新任毋庸稍遲延福濟所帶陝西防兵卽著歸瑛榮調度派委得力將弁前往統帶擇要駐紮以重邊防將此由六百里各諭令知之○賞知府劉蓉三品頂帶署四川布政使○壬寅 上詣 大行皇帝几筵前行月祭禮○官文胡林翼奏官

軍自攻克安慶後集賢關內外援逆陳玉城等率賊六七萬人向東徘徊道員曾國荃與多隆阿分途追剿初二日曾國荃派曾貞幹等從東路石塘湖畔進擊賊眾敗潰向五顯廟一帶逃竄曾國荃指揮各營將關內外賊壘賊館悉數埽平共殺賊二千有奇多隆阿一面督隊跟剿一面令候補副都統穆圖善進取桐城狗輔各酋排隊相抗多隆阿問道鈔出斃賊二百餘名穆圖善派副將譚仁芳等分路齊進直抵桐城西南北三門該逆以大礮轟擊我軍數伏數起拔毀木城以柴草填濠而過奮勇登城施放火器霎時火光燭天賊出東門而逸雷正綰譚仁芳等營一擁進城分路鈔截該逆不及出城者約一千餘人斬除淨盡當將桐城克復穆圖善擊殺賊匪三百餘人追至呂亭驛又斃賊四五百人餘賊向廬江奔竄其由黃泥港趨犯太湖之賊經溫德勒克西等馬隊追

殺一千餘人解散脅從七百餘人八月初六日偵知賊由劉公鋪等處悉奔宿松之桃花鋪溫德勒克西等三路鈔擊鏖戰數時連斃黃衣騎馬賊目數名悍賊百餘名賊遂大潰計斃賊二千餘名敗賊均奔宿松官軍追及賊奪西門而出當於初八日將宿松縣城克復敗賊悉竄黃梅我軍馬隊沿途追殺直抵黃梅大東門外賊屍徧野該逆復奔大河鋪城賊見勢不支卽由大西門出竄我軍截殺入城將未出城之賊擒斬無遺初八日將黃梅縣城克復其彭玉麟一軍派令礮船力攻蘄州署知州李瑜由陸路進擊賊向東路逃竄我軍截殺數百名蘄州城池亦於初八日克復多隆阿又於十一日派隊追勦廣濟之賊擒斬多名遂將廣濟縣城克復臣等查桐城爲七省要道又爲安慶咽喉該逆以悍黨萬餘踞城死守我軍克此堅城旬日之內由宿松黃梅蘄廣節節掃蕩斬

誠萬眾實足以申 天討而快人心所有尤爲出力之道員會國
荃可否賞給勇號候補總兵雷正綰等先行開列伏候恩施其餘
出力員弁兵勇容 臣等查明請獎 上諭內閣此次官軍追剿安
慶援賊屢獲勝仗並分兵克復桐城宿松黃梅蘄州廣濟等州縣
斬賊幾及萬人辦理甚爲得手著官文等仍飭帶兵將弁實力搜
捕淨盡勿畱餘孽記名按察使曾國荃著賞給偉勇巴圖魯名號
在事出力員弁兵勇著查明保奏○官文胡林翼奏黃郡踞逆負
隅固守並於城外築壘以抗我師經 臣等調派李續燾等及臬司
彭玉麟督水師各營扼截城賊相機進攻又派候補總兵成大吉
等馬步各隊駐紮上巴河其多隆阿於克復宿黃廣蘄四邑後統
帶馬步全隊在蘄水之曹家河會合迎剿下遊擊敗之賊以絕其
援八月二十三日蔣凝學令投誠之劉維楨設計誘賊全隊出城

我軍號礮一聲伏兵四起焚燒賊篷賊館火光燭天馬步衝擊賊屍徧野其逃奔三台河渡江者又爲水師圍剿落水死者無算我軍遂攻入城中搜殺餘匪當於二十四日將黃州府城克復並分軍追襲逃匪務期盡殲醜類以絕根株上諭官文等奏官軍克復黃州府城等語著官文等督飭各軍跟蹤追剿毋畱遺孽其在事出力人員並著查明保奏候朕施恩○諭湖北巡撫胡林翼秉性忠直操守廉潔由翰林歷官府道仰荷皇考大行皇帝特達之知於咸豐三年調赴湖北軍營晉擢巡撫賞給頭品頂帶太子少保銜在軍營九年賞罰嚴明知人善任克復武昌及沿江郡縣肅清楚境並調遣官軍攻復江西九江軍威丕振所向克捷本年克復安慶省城朕念其公忠體國懋著勤勞賞加太子太保銜並賞加騎都尉世職方冀長資倚畀克奏膚功乃以積勞成疾甫

經賞假遽聞溘逝披覽遺章實深悼惜胡林翼著追贈總督卽照
總督例賜卹任內一切處分悉予開復應得卹典該衙門查例具
奏並加恩予諡入祀賢良祠並於湖北省及湖南原籍建祠伊子
胡子勛俟及歲時由吏部帶領引見以示朕篤念盡臣至意尋予
祭葬諡文忠○調李續宜爲湖北巡撫仍駐紮湖北安徽交界地
方督辦軍務以彭玉麟爲安徽巡撫

由廣東按察使遷

未到任前仍以布

政使賈臻署理○癸卯諭內閣瑞昌王有齡奏民團會剿克復於
潛昌化二縣一摺上年十二月間甯國股匪竄陷於潛昌化二城
勢圖久踞本年六月二十一日昌化縣知縣汪春溥督率鄉團分
路進剿將昌化縣收復署於潛縣知縣包容於六月十五十六等
日帶團進剿於二十二日將於潛縣城收復剿辦尙屬得手各縣
出力紳董及陣亡團丁著瑞昌王有齡等查明奏請獎卹所稱該

縣並無城郭請將知縣汪春溥包容免其查議仍畱本任之處著吏部查照新定章程議奏○諭辭煥奏逆匪突陷金山衛城旋經官軍收復一摺此次副將滕嗣林參將梁安邦等被圍旬餘軍糧火藥俱盡全軍突圍而出尙非畏葸挫潰著從寬免其置議仍責令奮勇圖功以觀後效○諭聯捷段晴川奏巨捻回竄沿河上下游一律肅清一摺著聯捷等督率兵勇認真防堵毋令紛竄在事文武官紳著聯捷等酌保數員毋許冒濫○諭軍機大臣等瑞昌等奏浦江嚴州被圍諸暨桐廬同時喫緊一摺浙省南路軍務喫緊屢經諭令瑞昌等派饒廷選前往督辦乃該將軍等未能破除情面任令張玉良恇怯貽誤以致浦江嚴州同時被圍諸暨桐廬喫緊實堪痛恨此次嚴州城外各營如何潰退卽著瑞昌王有齡查明失事各員分別正法懲辦張玉良調度無方亦應據實嚴參

林福祥見在桐廬著卽責成該藩司兼顧嚴州但能力解城圍賊自未敢由桐廬深入該將軍等所派同知陳大力等兵勇均著催令速行前進交該藩司調度以厚兵力浦江被圍緊急並著責成饒廷選親督官兵前往救援不得株守諸暨致滋貽誤將此由六百里諭令知之○以劉坤一爲廣東按察使記名按察使○予江蘇陣亡知縣章振煦祭葬世職○乙巳僧格林沁奏江南擒匪先後分撲山東搶渡運河自泰安徑撲濟南勢甚猖獗臣以省城爲根本重地卽於八月十五日親統諸軍會同德楞額馬步兵勇取道泰安星馳前進該逆聞風東竄復盤踞湖山泊池南之孫家鎮十餘村沿湖泥濘頗難進攻二十七日德楞額等乘隙鈔擊殺賊多名該逆由蘄家橋改竄青州九月初一日馬步各隊追至河灘斃賊二十餘名初四日德楞額等於臨朐縣城南東西河岸設伏鈔襲

兩路各斃賊數百餘名初七日追至諸城縣屬五湖山口順河追殺斃賊百餘名復追至莒州屬蔣家嶺柳家店等處共斃賊二千餘名生擒賊一百餘名初十日追至沂水縣沂河東岸突見黑旗捻股跨河抗拒我軍分隊奮壓賊紛紛敗退追殺十餘里復經德楞額等帶隊衝殺斃賊一萬餘人救出難民數千名黑旗股匪剿殺殆盡並斃賊目數十名十三日追至蘭陵鎮將步賊千餘全行剿滅餘匪向徐州敗竄回巢擒匪頻年未受懲創此次經我軍痛加剿洗實足以寒賊膽而快人心臣自當激勵兵勇乘勝勦辦並設法勦撫兼施以期立就藏事上紓宸廑在事官弁兵勇追剿竄匪十餘晝夜裹糧進隊連獲大勝前後共計斃賊萬數千名之多實屬奮勉從事謹擇其尤爲出力者先行開列仰懇恩施其餘出力文武兵勇並請覈實獎勵出自逾格

鴻慈

上諭內閣

匪自入東境以來雖屢經剿擊總未受懲創此次僧格林沁親督大軍痛加剿洗殲除殆盡洵足以寒賊膽而快人心僧格林沁躬冒矢石調度有方著加恩賞還御前大臣並賞還黃韉以示優獎其餘出力官弁兵勇著准其擇尤保奏候朕施恩○諭軍機大臣等前據勝保奏請調建昌駐紮之黑龍江馬隊當以該處尙有土匪藉資彈壓未准分撥本日據勝保奏渡河擒匪猖獗仍懇將建昌所駐馬隊飭撥前往一摺駐紮建昌之黑龍江馬隊一千名見須彈壓土匪且另有調派之處斷難撥赴勝保軍營所請仍無庸議至所稱擒匪欲分東西中三路北擾等語該大臣前次奏報北路軍務肅清何以此次擒匪乘該大臣北上之隙渡河紛擾爲詞復行瀆請必欲添調馬隊希圖卸責著就見有兵力分投截剿儻任令該匪乘間北犯朕惟該大臣是問恐不能當此重咎也將

此由六百里諭令知之○命裕麟來京以閭敬銘爲湖北按察使

候補按察使

○以各省漕糧奏銷遲延飭各督撫嚴催造報○添派工

部右侍郎宋晉恭理喪儀○改四川建昌鎮屬登相汛爲靖遠新營添設相嶺頂象鼻嶺長老坪三汛改設龍潭溝一汛添築木厰溝過路坎礮樓各一座移設遊擊千總各一把總外委各三額外一移設馬戰守兵一百五十名添募新兵一百名練勇三百名○予湖北陣亡知縣倪應熙祭葬世職○丙午 上以奉移 梓宮回京日期詣 大行皇帝几筵前祇告行禮○予四川陣亡遊擊吳偉南祭葬世職○丁未 上詣 大行皇帝几筵前行啟奠禮嚮夕復行辭奠禮○復浙江殉難已革知府李文瀛原官予祭葬世職○戊申恭奉 大行皇帝梓宮由山莊啟駕 上詣 几筵前奠獻哭盡哀步送至西櫟木西由間道豫詣 蘆殿敬視陳設

梓宮至跪迎於幔城北門外奉安訖行夕奠禮詣行宮東所問
母后皇太后安西所問 聖母皇太后安至還宮皆如之○諭
內閣瑞昌王有齡奏嚴州浦江尙未解圍援軍潰退請將帶兵各
員并分別懲處等語浙江嚴州府城被圍後張玉良派副將劉萬
德等分紮北峯塔山堽口烏石灘等處因賊勢過重都司張元勝
營盤被陷復撲楊繼昌等營盤諸軍退守城內城圍尙未能解浦
江縣城被圍倭總兵文瑞等嬰城固守饒廷選派令各軍於鄭義
門紮營進剿該逆大股由山徑鈔襲賊眾兵單全行潰退著瑞昌
等嚴催援兵迅解城圍毋令稍有疏虞其首先潰退各弁除外委
李林亨余綢繆業經軍前正法外參將王興棠劉金標遊擊莊廷
禮都司郭連城張明守備蘇吉良千總周連高吳春瑞著一併革
職暫畱軍營千總高桂雲著拔去藍翎革去都司以外委畱營效

力嚴州前次潰退之副將劉萬德遊擊尹沛霖都司何朝倫楊繼昌于海晏劉廷玉陳步桂張國楨守備楊占魁著一併革職副將陳步高前次嚴州失守案內本應發往軍臺此次復經失守營盤著從重發往新疆效力贖罪仍與劉萬德等九員均暫畱軍營責令戴罪圖功以觀後效棄營不守之都司艾金魁李恆清把總虎懷棟畏罪潛逃著瑞昌等通飭各屬嚴拏務獲就地正法浙江提督饒廷選統領諸軍紀律不嚴以致潰敗咎有應得著交部嚴加議處○己酉 上詣 蘆殿行朝奠禮跪送 梓宮啟行後恭奉兩宮 皇太后啟蹕由間道先至常山峪○袁甲三奏據翁同書來函苗沛霖圍壽之隊於城外挑挖長濠勢將久困城內米糧缺乏情形危急萬分臣聞信焦灼挑選精銳五千人派臣子侍講銜翰林院編修袁保恆統帶前往於九月初十日水陸並進懷遠本

無城池上年經苗練會同民練修築石圩作爲城垣臣前以該練動輒脅制地方官恐滋他故是以札調知縣英俊前赴臨淮此時先期示諭懷遠公局迎官進城一概不究既往詎苗沛霖死黨張士端等偪脅居民不肯開城並糾眾於渦河口築壘抗拒選數百悍賊守之以阻我兵進路屢次遣人開導竟敢開礮抵敵不得不痛加勦洗十二日我軍出隊人人奮勇爭先立將賊壘攻破悍賊斬殺淨盡無一得脫該逆計窮死踞新城我軍水陸環攻連開大礮斃賊不可數計已將東門轟坍數丈被該逆用槍礮抵住輒石填塞未能搶進袁保恆以城內負隅扼守不過死黨數人爲之主持其餘多係良民不盡甘心從逆一面於渦淮兩岸咽喉之地分立營盤先據要害形勝全爲我有一面收復附近民圩告以此次出師專誅苗沛霖一人以解壽圍此外概不株連其從前勦賊立

功得有官職者亦均照舊各圩練總感激涕零渦河北岸均已反
正其沿淮各圩先經出示安撫並選派妥員親赴各圩勸諭陸續
歸正者亦三四十圩城內踞逆自知勢孤聲言投誠臣以賊情狡
獪難保非因另有詭謀故作緩兵之計仍飭嚴密防剿斷其糧道
絕其樵汲如果城內將著名助逆之人捆送出城再行酌量辦理
但苗沛霖尙在壽州城外聞知我軍進發勢必圍攻愈緊袁保恆
一軍難以遠赴壽州臨淮爲根本重地四面皆賊亦難再行分隊
正深焦慮聞據候補總兵朱元興稟報帶隊五千人並副將蔣立
功倪文藻等已到五河隨即連夜催趲已於十五日到臨臣密授
機宜卽令朱元興等將見帶隊伍剋日統帶上駛徑越懷遠直趨
石頭埠進解壽固臣查苗沛霖以文生辦練蒙恩擢四川川北
道候補鹽運使加布政使銜賞戴花翎並給勇號稍有天良者宜

如何恪遵法紀勉圖報效乃與壽州練道構戮尋仇不候查辦遽爾稱兵已屬悖謬迨經臣再三開導於徐立壯伏誅孫家泰監斃後怨忿已洩猶復肆意要求圍壽愈急且甘受粵逆僞封倡令練眾蓄髮派黨四出掠擄兇淫殘暴人人切齒今大兵進至懷遠已獲大勝尙不自縛請罪轉逞兇橫遣黨抗拒尤屬瞽不畏死應請皇上明降諭旨將苗沛霖卽行革職拔去花翎革除勇號聲罪致討以正人心而作士氣並請飭下賈臻迅速派隊由潁上正陽一路會合夾擊共剪巨兇仍飭李續宜酌帶楚師星速來皖並飭官文胡林翼嚴樹森毛昶熙田在田一體兜剿以免紛竄其向被脅從附爲苗黨者仍設法解散不究旣往庶亂臣賊子無所逃於天地間矣再李世忠定於十二日由滁起程計日卽可到臨亦卽督隊繼進並聞壽州城南到有楚師已與苗逆接仗大勝道路聞

傳未知是否的確亦未知係何人所派既有此說似非無因見飭
朱元興等趕緊上駁會合夾擊 上諭內閣袁甲三奏道員甘心
叛逆派兵進討一摺四川川北道苗沛霖以生員辦理團練受

皇考大行皇帝厚恩四年之間擢任道員以記名鹽運使賞加布
政使銜並賞給花翎勇號該員宜如何感激圖報乃因所部練勇
被害糾眾圍攻壽州 皇考不加譴責諭令袁甲三秉公查辦迨
經翁同書查明起釁根由將徐立壯正法孫家秦於監禁後旋亦
畏罪自盡該員自己無所藉口乃圍攻壽州之練不卽撤退復遣
其黨苗金開等竄擾河南日形跋扈茲據袁甲三奏該練圍攻壽
州愈急並令死黨張士端等踞守懷遠抗拒官軍且受粵逆偽封
偏令練眾蓄髮四出搶掠是其甘心叛逆自外生成萬難寬貸四
川川北道苗沛霖著卽行革職並拔去花翎撤銷勇號卽著袁甲

三李世忠調派官軍並會合賈臻田在田嚴樹森毛昶熙等各路
兵勇奮力進剿以申國法各帶兵大員止將逆首苗沛霖擒獲盡
法處治其黨與如自拔來歸概免究辦其從前立功得有官職者
亦各照舊如能縛獻首逆或隨同官軍剿賊出力仍當優加獎勵
並著袁甲三等曉諭該練眾人等知之○諭軍機大臣等前經諭
令官文等酌量分撥兵勇會剿苗練本日據袁甲三片奏有傳聞
壽州城南到有楚師已與苗逆接仗大勝之語是否官文等尙未
見奏報見在壽州被圍危在旦夕安慶舒桐均已克復楚軍諒可
分撥著官文會國藩李續宜彭玉麟迅卽派撥勁旅分道並進立
解壽圍並與李世忠各軍聯絡聲勢務令逆練授首以期廓清皖
北苗沛霖黨與苗金開等窺伺豫省亟須防其勾結粵捻各匪北
犯陳州宿徐一帶地方緊要著嚴樹森毛昶熙田在田嚴爲防範

母令紛竄並著賈臻迅速派隊由潁上正陽一路會合李世忠等奮力夾擊不得延誤將此由六百里各諭令知之○諭此次袁甲三派兵水陸攻勦苗練進至懷遠該練膽敢率黨於渦河抗拒經我軍紮營要隘屢挫兇鋒自不難剋期攻拔惟壽州待援孔亟見在宋元興業已帶隊趕到著卽迅催該總兵徑越懷遠直趨石頭埠進解壽州城圍李世忠計日亦當到臨並著督隊繼進務將首惡殲除毋得遷延觀望致誤事機將此由六百里諭令知之○飭催各省協餉迅解袁甲三軍營○飭山陝按月籌解出在田軍餉並另撥河東鹽課銀每月一萬兩○壬子予安徽陣亡府經歷鄭揆祭葬世職○甲寅 上奉 母后皇太后 聖母皇太后還宮 上奉 母后皇太后居綏履殿 聖母皇太后居平安室每日親詣問安自是以爲常○乙卯諭王公百官等上年海疆不靖京

師戒嚴總由在事之王大臣等籌畫乖方所致載垣等復不能盡心和議徒誘獲英國使臣以塞己責以致失信於各國淀園被擾我皇考巡幸熱河實聖心萬不已之苦衷也嗣經總理各國事務衙門王大臣等將各國應辦事宜妥爲經理都城內外安謐如常皇考屢召王大臣議回鑾之旨而載垣端華肅順朋比爲奸總以外國情形反覆力排眾論皇考宵旰焦勞更兼口外嚴寒以致聖體違和竟於本年七月十七日龍馭上賓朕搶地呼天五內如焚追思載垣等從前蒙蔽之罪非朕一人痛恨實天下臣民所痛恨者也朕御極之初卽欲重治其罪惟思伊等係顧命之臣故暫行寬免以觀後效孰意八月十一日朕召見載垣等八人因御史董元醇敬陳管見一摺內稱請皇太后暫時權理朝政俟數年不厭能親裁庶務再行歸政又請於親王中簡

派一二人令其輔弼又請在大臣中簡派一二人充朕師傅之任
以上三端深合朕意雖我朝向無 皇太后垂簾之儀朕受 皇
考大行皇帝付託之重惟以國計民生爲念豈能拘守常例此所
謂事貴從權特面諭載垣等著照所請傳旨該王大臣奏對時曉
曉置辨已無人臣之禮擬旨時又陽奉陰違擅自改寫作爲朕旨
頒行是誠何心且載垣等每以不敢專擅爲詞此非專擅之實蹟
乎總因朕沖齡 皇太后不能深悉國事任伊等欺蒙能盡欺天
下乎此皆伊等孤負 皇考深恩若再事姑容何以仰對 在天
之靈又何以服天下公論載垣端華肅順著卽解任景壽穆蔭匡
源杜翰焦祐瀛著退出軍機處派恭親王會同大學士六部九卿
翰詹科道將伊等應得之咎分別輕重按律秉公具奏至 皇太
后應如何垂簾之儀一併會議具奏特諭○諭內閣本日據賈祖

周祖培沈兆霖趙光奏政權請操之自上並 皇太后召見臣工
禮節及一切辦事章程請飭廷臣會議並據勝保奏請 皇太后
親理大政並另簡近支親王輔政各一摺著王大臣大學士六部
九卿翰詹科道將應如何酌古準今折衷定議之處卽行妥議以
聞○諭前因載垣端華肅順等三人種種跋扈不臣朕於熱河行
宮命醇郡王奕譞繕就諭旨將載垣等三人解任茲於本日特旨
召見恭親王帶同大學士桂良周祖培軍機大臣戶部左侍郎文
祥乃載垣等肆言不應召見外臣擅行攔阻其肆無忌憚何所底
止前旨僅予解任實不足以蔽辜著恭親王奕訢桂良周祖培文
祥卽行傳旨將載垣端華肅順革去爵職拏問交宗人府會同大
學士九卿翰詹科道嚴行議罪○諭著派睿親王仁壽醇郡王奕
譞將肅順卽行拏問酌派妥員押解來京交宗人府聽候議罪○

李績宜奏臣以皖臬蒙恩超授安徽巡撫感激涕零懼乏報稱適
逆黨上竄鄂垣前湖北撫臣胡林翼臥病太湖臣以鄂省爲東南
根本不得不帶兵赴援先其所急原期速靖鄂疆卽行回皖無如
賊勢蔓延刻難殄滅撫躬自責焦灼難名茲幸鄂省各屬漸就肅
清隨州孤城旦夕可拔臣以爲不久卽可東下以盡官守而救瘡
痍不料前撫臣胡林翼自回援後病勢日篤陳請開缺蒙 皇上
命臣暫署撫篆惟念皖中軍事孔棘百倍於鄂避難就易臣心實
有未安見值安慶初克亟宜乘此軍威殲除醜類慎選賢能問民
疾苦以期綏定勞來藉紓 聖主子惠元元之至意至湖北近年
軍餉支絀積欠約四百餘萬若非力清前路復民故業以開財源
饑潰甚屬可虞且皖爲鄂之門戶皖賊一日未滅鄂卽一日不安
表裏相依實有不能不亟圖之勢況臣之胞兄李績賓進規廬州

戰歿三河殉難者逾千人國憤家仇此尤臣伏干枕戈寤寐不忘者也臣部下兵勇見擬飭令將弁移赴楚皖之交扼要駐紮再四思維惟有籲懇天恩准臣仍回安徽本任效犬馬之勞成區區之志雖粉身碎骨不足圖報上諭內閣前經降旨將李續宜調補湖北巡撫駐紮湖北安徽交界地方督辦軍務茲據李續宜奏皖中軍務百倍於鄂懇請仍回安徽本任等語自係尙未接奉前旨李續宜著仍遵前旨駐紮湖北安徽交界地方督辦軍務以專責成○曾國藩奏鮑超一軍在豐城西岸大獲勝仗該逆退出豐城後大股盤踞白馬寨小塘墟西竹墟等處分股竄小江口大江口一帶鮑超於七月二十七日過河進剿白馬寨小塘墟一帶之賊沿山鈔擊該逆紛紛敗竄我軍連日追擊該逆另股圍攻撫州府城知府鍾峻等登陴固守八月初四日鮑超一軍進至城下

撫州之圍立解該逆望許灣大路而逃先是七月下旬安慶援賊多而且悍詎調鮑超馳援江北該鎮於初五日兼程回援初十日行抵距省四十里之武陽渡始知安慶業已克復乃遂星夜折回於十四日再抵撫州查得該逆大股已竄往貴溪雙港湖坊河口一帶會合湖坊之花旗廣匪三股賊眾號稱二十餘萬蔓延數百里層層築壘意圖回竄並分股竄往弋貴廣信一帶鮑超於十五日自撫郡進兵冒雨進行二十日馳抵貴溪貴溪之賊聞風逃遁二十二日五鼓鮑超率隊進剿卯刻行抵雙港逆首偽忠王李秀城先由河口率眾至湖坊句結哮天豫朱逆觀天燕童逆勒天福余逆享天祿黃逆並花旗廣匪等股整隊迎敵洶湧如潮鮑超飭宋國永等分路鈔擊自卯至巳鏖戰三時該逆大敗拋棄器械奪命狂奔我軍追殺六十餘里沿途斃賊一萬餘名墜巖落澗死者

尤多將雙港九思巖同河口湖坊一帶賊壘七十餘座全行踏平
生擒長髮老賊近二千名訊明正法追至河口該處踞賊一併驅
逐是夜探馬回稱湖坊河口之賊敗往鉛山者皆盤踞於東門外
三十里之梓溪一帶意欲勾通城賊抗拒官軍四鼓時鮑超率領
馬步全軍進攻鉛山卯刻已抵城外該逆於北門外堅築七壘與
城內之賊相爲犄角鮑超飭令陳由立譚勝達分投攻壘擁入濠
邊先將左路賊壘踏平旋將右六壘鏟毀壘中之賊盡數殲除各
營乘勝過河分段攻城賊於城上施放槍礮相持兩時之久鮑超
親執桴鼓火箭燃燒城內藥桶賊眾慌亂副將譚勝達卽緣梯登
城該逆見勢不支潛開東門逃走我軍先登者立開北門各營一
齊入城當將鉛山縣城克復追殺六十餘里賊屍徧野生擒老賊
八百餘名將梓溪一帶踞賊全行剿洗馬隊追過廣信立解郡圍

伏查閩賊三起與花旗廣匪先後由建昌竄至廣信盤踞雙港九思巖河口湖坊鉛山一帶兩月有餘蔓延極廣又加僞忠王一股由撫州肆竄該處併聚一路經鮑超痛勦兩日埽平賊壘八十餘座克復鉛山縣城周圍追擊二百餘里風馳電掣洵足以彰天討所有陣亡之都司王友得等請旨交部從優議卹又奏總兵鮑超驍勇罕匹轉戰安徽湖北江西三省所向克捷本年正月破黃汶金大股於洋塘四月破劉瑋琳大股於安慶厥功甚偉其部下各營官如豐城案內隨招請保加提督銜之候補總兵宋國永陳由立黃慶請保升補總兵之婁雲慶張玉田等皆陷陣衝鋒戰功卓著此次克復鉛山縣城連解撫州廣信兩郡之圍竭力奔馳不得少休未滿兩月將江西腹地各賊一律埽除全省肅清實屬勞苦功多可否籲懇 皇上特恩將鮑超補授提督實缺抑或另有

恩獎之處恭候

聖裁其所部之候補總兵宋國永陳由立黃慶

婁雲慶張玉田等均請以次補授總兵實缺以示懋賞而勵戎行

上諭此次鮑超一軍追剿股匪大獲勝仗克復鉛山縣城生擒

老賊八百餘名梓溪踞賊全行剿洗洵足以彰天討所有陣亡之

都司王友得等均著交部從優議卹記名提督鮑超著交軍機處

遇有提督缺出儘先提奏總兵宋國永陳由立黃慶婁雲慶張玉

田均著交軍機處遇有總兵缺出提奏以昭懋賞○詔文武各衙

門及三品以下京堂各官自十月十六日爲始輪班值日○以調

度合宜所向克捷予多隆阿以都統簡放予提督楊載福優敘○

以復湖北黃州功總督官文巡撫李續宜得旨嘉獎○曾國藩奏

安慶克復以後臣移紮省城諸務紛集無一司道大員分任其責

實有叢脞不勝之虞查向來定例隨總督駐紮江甯者有布政使

一員糧道一員鹽道一員隨皖撫駐紮安慶者有布政使一員按察使一員近因兩省淪陷本缺各員僑駐淮揚泗穎等處臣忝任江督年餘無司道一員相隨雖佐雜微員必須親自札委刑名錢穀必須親自綜覈不特體制不合亦且精力難周若不急爲部署深慮親細務而誤大局再四籌思擬於安慶省城酌派司道數員分任其責如江甯布政使王夢齡見在署理漕運總督駐紮淮安應另派一人署理該缺臣同駐安慶管轄上游印委各員凡蘇省官員距潁州太遠者升遷調署由該司權代詳辦又如安徽按察使張學醇見擬駐紮臨淮聲息不通應另派一人署理該缺同駐安慶管理安池徽等郡刑名驛傳事務又如江安糧道王朝綸見在代辦江北糧臺駐紮揚州應另派一人署理該缺同駐安慶專管皖省七府漕糧事件該缺之職向章本管蘇糧三府皖糧七

府也又如江甯鹽巡道邢春第見未到任亦應另派一人署理該缺同駐安慶專管淮鹽事件此四缺者分別處置庶幾職有專司思不出位臣得官盛任使之效庶幾專心軍旅用志不紛間或馳赴各府巡察營務亦不至拋廢公事實於軍務地方兩有裨益擬俟遴選得人再將四缺陸續奏派署理請旨遵行得旨允行○是月豁免甘肅西甯碾伯二縣被擾村莊應徵糧草